

*ASO FARAILE, 24 IUNI 2016*

*Na nofoia le nofoa e le Fofoga Fetalai i le itula e 9:00 i le taeao.*

Tatalo

**SAUNOAGA FAAFEILOAI A LE FOFOGA FETALAI**

**FOFOGA FETALAI:** Ou te faasilasila atu ua toe amatalia Taualumaga ma galuega a le Fono Aoao Faitulafono. Ua tuu ama i figota ae olioli livaliva lenei taeao aua sa tatou vao eseese ao lenei ua tatou fuifui faatasi i lenei taeao ona o le agalelei o le Atua i lo outou soifua ma lo tatou ola galulue. Ia motu i lagi le fetu tali matagi aua lenei taeao. E i ai le manatu ua maua le malosi o le Afioga i le Palemia, ma le mamalu i le Kapeneta ae faapea foi Sui mamalu o le Palemene, aemaise foi o Faaluuluga o Matagaluega ma Faalapotopotoga o le Malo, ae a le Failautusi o le Fono, ma le Sui Failautusi ma le mamalu o le Afaigaluega ma le auaunaga faifaipea a le Matagaluega o Leoleo ma Falepuipei e tusa ai ma le tatou o le tautuaina o le Fono a le Palemene, ia aua le alofaiva o Taitai o Samoa.

Ia malo faafetai, faatalofa atu ai i le agaga faaaloalo. Ia faapea foi le faafofoga tapuai mai o Samoa ia aemaise foi o le aufaitatalo i le latou faanono manu i lea aso ma lea aso, ia ae a se manuia o Samoa ma lo tatou Palemene. Ia foi lava le viiga i le Atua.

**TULAFONO TAU FAAOFI O LE FAATATAUINA O TUPE  
FAAOPOPO (NU. 2) MA LE TULAFONO TAU FAAOFI O LE  
FAATATAUINA O TUPE 2016/2017 – felafolafoaiga faaauau i luga o le  
faitauga faalua**

**FOFOGA FETALAI:** O le a faaauau le saunoaga a le sui usufono i le tulaga Tau Tupe ma le tamaoaiga o Samoa faapea Faiga Faavae Tau Tupe a le Malo e auala i luga o le faitauga faalua o le Tulafono Tau Faaofi e pei ona amataina mai i le Aso Fono talu ai.

E tolopo foi galuega a le Fono Aoao i le tatou Fonotaga i le po anapo ua maea ona tali fuaitau le Minisita mo Galuega, Felauaiga ma Atinae Eeseese i mataupu sa laga e sui usufono mamalu i a latou saunoaga.

Ia i lou ava ma lou faaaloalo ou te tuuina atu ai lenei avanoa i lau Afioga i le Minisita mo Faatoaga ma Faigafaiva ia mo lau saunoaga i mea sa e sui usufono mamalu.

24 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafaiga faaauau i luga o le faitauga faalua**

**Susuga Hon LAAULI POLATAIVAO LEUATEA (Minisita mo Faatoaga ma Faigafaiva):** Faafetai i lau Afioga i le Fofoga Fetalai o le Maota Fono o Samoa, i le avanoa ua tuuina mai i lenei Matagaluega e fai atu ai se tala faamalamalama ma se tala faamanino e uiga i mataupu na tulei ma saunoa i ai le paia ma le mamalu o le Maota Fono a le atunuu. Ae muamua ona ou oo piiama i lou fofoga lafo i lenei taeao i le tatou faasagi ma le faapolo i le Atua, na tatou faanonoi ai ma tatou lafo le taula i Malolo i lana faatufugaga ua liutua i afa e aveva ma malu, ae taoto ia te ia le peauvasa ua tatou aulia ai lenei taeao manuia.

Lau Afioga i le Fofoga Fetalai, o le a ou taumafai e tali atu le upega a Samoa lea ua toe lalafa i le Maota Fono o le atunuu. O le Matagaluega lenei, o le Ofisa o Faatoaga ma Faigafaiva, o le Matagaluega o foafoaga mamana a le Silisiliese. Fai mai na maea loa ona tuu eseese e le Atua le ao ma le pouliuli, na tuu eseese le sami ma le eleele matutu faatu loa le Matagaluega lenei o le Ofisa o Faatoaga, tuu i ai ma manufeleele ma manu vaefa ma manu uma o Lana foafoaga faatoa a fai ai loa Atamu e tuu i ai e vaaia le faatoaga. O lona uiga lau Afioga i le Fofoga Fetalai, e silafia lelei e le Atua o le fatu lenei o Ana foafoaga, o faatoaga ma faigafaiva.

Lau Afioga i le Fofoga Fetalai, o le fesili i lenei taeao; O ai le manumalo? O ai le pule? O ai le Silisili Ese? Ua mafai ai ona tatou aofaga potopoto, ma o matou vaavaai atu e silasila mai lau Afioga a le Fofoga o le Fono. O le tali, o le Atua Soifua o Le ou mea uma, ua mafai ai ona tatou fesilafai, i magafetau ola, ma magafetau soifua i le lagi e mama ma le soifua manuia. Ia foi pea la i le Atua Lona viiga, ae tau ia ina ou faapoipoi vagana, tulou Samoa, o oe o le aomamala, e leai se vave, leai se poto, na te toe autalaina ou sa ma faiga e paia e tumau.

O lea ua uma ona faalalanu ma faalagi le paia o tuleiga ma saunoaga i le Maota Fono o le atunuu. A o e pati ma e po ma e tapuaia Samoa lau faiga filifiliga lea ua tulai atu ai, le Palemene XVI lenei. Sa sama se mago, fili se vave tautai se poto. Ua a nei? Lau Afioga i le Fofoga Fetalai. O le a se tatou maitau ma se tatou tilotilo i le taunuu mai o le amataina o le uluai Tala o le Tupe o lenei Fonotaga. O le a sa tatou maitau i le mea na tatou amata mai ai e oo mai i le aso? Samoa faafetai i lau pule, faafetai i lau tofa ma lau faatofalaiga lea ua faaali, saunoa nisi o tootoouli o le atunuu, e paeaiga ae le lau Paeaiga, o le a le mea ua tulai mai i le Paeaiga lenei? Ua tatou toe foi i le faavae o le atunuu lau Afioga i le Fofoga Fetalai. E fou nei faatemokarasi ma faiga faaneionapo, ae a le faavae o Samoa? Lau Afioga i le Fofoga Fetalai e le tau fai atu, ua foi le vai i le mea na tafe mai ai, ua toe foi le atunuu i le tasi, mai fea le tofa? mai fea le faautautaga? O le tofa moni lea a Samoa. Lau Afioga i le Fofoga i le Fetalai, na tatou amata mai e leai ni Vaega faaupufai tulou lou gagana. Ina ua ou taunuu mai i le Maota lenei i le 2006, o lau lauga faataupou lea sa fai, ua ou manatu o Samoa e foi a i le tasi. E le mafai ona lua, aua foi o le atunuu e fau i le tofa ma le faautautaga loloto.

24 IUNI 2016

**Tulafono Tau Faaofi o le Faatatauina o Tupe Faaopopo (Nu. 2) ma le Tulafono Tau Faaofi o le Faatatauina o Tupe 2016/2017 – felafolafoga faaauau i luga o le faitauga faalua**

I lenei la taeao i lau Afioga i le Fofoga Fetalai, tatou vaavaai i le palota e uma atu le palota ae fai i le faamasinoga, na a? Na omiomi i le tulaga lautele o le tofa ma le tofa ma le faautautaga loloto e foia ai mea uma. Faafetai Samoa i lau tapuaiga alo maia o le a taumafai lou Palemene ma le galuega, e faatino le faamoemoe.

E fia faaogaina lenei avanoa i lau Afioga i le Palemia eí .

**Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoi (Palemia):** Lau Afioga i le Fofoga Fetalaií ..

**FOFOGA FETALAI:** Le Minisita mo Faatoaga ma Faigafaiva, se i tulai mai le Taitai o le Malo...

**Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoi:** O lou tulai atu ao lo o folau le vaatele i le saunoaga a le Minisita o lo o gafa ma Faatoaga. Ia ma Minisita foi o lo o totoe, e i ai le faamoemoe o le ta o le 10 e amata ai ona matou tali, lea lau fautuaga i a outou Afioga i Minisita o lo o tali, se i tautuana ma outou o le ta o le 10 e amata ai ona faaauiliili le Tala o le Tatou Tupe, ina ia pasia nei le Tala o le Tupe ae taatia isi mau gaosa e le uma le fai aso o le Atua. Ia o lou tulai atu lea lau Afioga i le Fofoga Fetalai ona o le tulaga ma le faamoemoe o le ta o le 10 e amata ai ona auiliili le Tala o le Tupe. Ia o le tele lava o mataupu e le o ni mataupu foi lele, e i ai a le upu foi lele e le uma le fai aso o le Atua aua e lea faua foi Roma i se aso e tasi. Ia o le tuualalo lea i le matou vasega i Minisita ina ia faafaigofie le tatou aso.

**FOFOGA FETALAI:** Malo faafetai, ia ma e faamanatu atu o lena ua saunoa ma malele le Afioga i le Taitai o le Malo ia ona o le tulaga e manatu ina ia vave feagai le Kapeneta ma le faatinoga o galuega ae a talosaga a sui e pei foi ona faamamafa, ia e lelei ona fuafua ae faamoemoe e faatino ma teleai ona faatino ia galuega, ma e faamanatu atu i le mamalu o le Kapeneta ma le fono, o le Aso Farai le lenei, ia le silia i le itula masani ma tatou faamuta ai le tatou galuega ia ma faamoemoe vagana se lafo e faatu mai, ia na faapena lea ona tatou galulue faatasi e pei ona malele le Afioga i le Palemia faafetai.

Lau Afioga i le Minisita mo Faatoaga ma Faigafaiva, tulai mai.

**Susuga Hon LAAULI POLATAIVAO LEUATEA:** Lau Afioga i le Fofoga Fetalai e tumu i le ava ma le faaaloalo e le faia foi se loto, ae o le naunauga o lou nei sui usufono faatoa ulufale mai i le Kapeneta, e le omia faaniualeale le agaga faafetai. O le ala lea o le taumafai atu. Lau Afioga i le Palemia, faafetai, i lou amanaia o lenei itumalo, filifilia ai au ou te sau e tauave le tulaga, lafo mai lou faatuatuaga.

24 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

Lou itumalo, ia po laia o le fala ma tatalo mai, o la matou tatalo, maua lau tapuaiga aua tofiga a le Malo ua tatou feagai ai. O lenei foi vaitau i fuafuaga ma faamanuiaga e pei ona tatou maua, viia le Alii.

E momoli lau faafetai i le Afioga Le Mamea Ropati, o le sa avea ma Minisita o lenei Matagaluega. Tele galuega faaauau o lea sa tele ai finagalo faaalua i totonu o le Maota lenei, i finagalo ma le upega Samoa ua toe lalafa e ala i le tele o tuleiga ma saunoaga ma mea uma sa outou saunoa i ai i le Matagaluega. Ou te le alo i se ata o le niu, sao outou, pei ona saunoa le Taitai o le Malo leai, leai se mea atoatoa, a o le taumafai atu o le Matagaluega i le galuega na amata mai i le uluai tutoatasi o Samoa e oo mai i le taimi nei, e oo ma i i le taimi nei o lo o faasolosolo galuega taumafai. E leai se faiva e maumau, tele ma anoanoai faafitauli, e fai o le atunuu, e fai o le aufaifaatoaga e fai o le aufaifaiva, ae o lape foi o le Matagaluega. 15 sui na saunoa i le tulaga o le talo, talo o le mataiai ma o le faalagolagomaga a le tatou atunuu.

Ua tatou iloa, le uluai tausaga o le 1962, 60% sa faalagolago i ai le atunuu i mea tau faatoaga. O le taimi lenei, tele le faaletonu o le tulaga ona o mea tutupu e pei ona ou fai atu, faamai, faafitauli, suiga o le tau, afa, ma mea na tatou feagai ai, ui o lea, tea na taimi. Tatou te le toe vaai i ai ma tatou tiloitlo ae aoga mean a tutupu, aoaoina ai ma faatonutonu folau ai le lumanai.

20 tausaga, 30 tausaga o tatou mafatia i le lega, o le taimi lenei, faafetai i le Atua. Fai fai sailiiliga ma suega a le Matagaluega, 5 a tatou talo, lelei ua maua mai. O talo la nei, o lea ua amata ona tatou avatu i maketi i fafo, e toe maua mai ai ni tupe maua o a tatou tupe, peitai o lo o i ai foi faafitauli, faafitauli muamua, e le lava le tatou talo, nai lua masina talu ai nei, ,ae aumai ai le oka container 22, na o le 2 container na mafai ona ave. O le galuega la a le Matagaluega ua sauni nei e fai, ua sauni le Matagaluega e toe fai faamiliga a tiapula ia lava, ae manaomia la aua ua avanoa le tatou Ofisa i Nuu ua matua fai le breeding o species eseese uma nei o talo nei e 5, ina ia maua le tele o tiapula mo le tatou aufaifaatoaga. O aso ia a avatu nao le tai 10 tiapula a le faifaatoaga, e umi le taimi o tau faafailele ma tau faatupu. I le taimi lenei i fuafuaga faataatitia ua oo i ai suesuega a le Matagaluega, fai ia lava le tatou planting materials. O le tau o le pusa talo lea ua i a ii le taimi lenei, i le va o le \$50 i le \$60 i le 20kilo. O le matafai o le Matagaluega, saili maketi fesoasoani i le Minisita o Pisinisi ma Alamanuia ina ia aua nei toe i ai le mea lea o le fluct o le tatou talo o mea nei.

O le tulaga o nisi o mataupu sa taua e sui mamalu le tatou fua o fualaau aina, o lena na ou faamalamalama i se tasi o tatou semina i luga. E 6 miliona o lo o faaalu e le Malo e aumai ai kapisi lapotopoto ma kapisi saina ma kaloti ma mea i fafo. O le fuafuaga a le Matagaluega i le taimi lenei, faamalasia le auaunaga ma agai e toe unai le tatou meganisation ma le commercial farm ina ia mafai ona tatou toto lava e tatou a tatou fua o fualaau aina ma a tatou mea e gaosi ai tatou meataumafa i Samoa, ae aua tatou te toe faalagolago i atunuu i fafo.

24 IUNI 2016

**Tulafono Tau Faaofi o le Faatatauina o Tupe Faaopopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

Na taua e nisi o sui usufono le tatou stimulus package, faamalulu atu pe afai o le a sa outou silasila i le taumafai atu o le Matagaluega. O le agaga o le Malo, \$2.5miliona na aumai e le Matagaluega e fai ai ponesi, koko, kofe, popo. O le agaga ina ia toe lava tamaoaiga leni o le atunuu lea ua outou vaavaai i ai, 3, 4 fale sukalati o lea ua toe agai mai e sue le koko Samoa. Tatou te le toe tepa i tua i le faaletonu na tatou aumaia ai le koko Solomona, tatou agai a tatou e toe koko le tatou koko. O le talitonuga lea ua i ai, tatou toe foi i le mea sa tatou ola mai ai o le koko Samoa, o le koko pito i sili lena ona talafeagai. O lo o faasolo le stimulus package ma le fautuaga, o le a taumafai le Matagaluega e toe ave le fautuaga i le Kapeneta, e toe faaauau le tatou ponesi leni ona ua i ai le faatuatuga o i, e maua ai nisi fualaau fou ma fualaau e atinae ai le atunuu i leni atinae taua. Afai e maea ona faatulaga le polokalame lea mai le 500 tagata lesitala, e uma ane le polokalame, ua maua a tatou koko e 375,000, ua maua a tatou kofe e 125,000, ua maua a tatou niu e 25,000. O fua lena o le galuega na finagalo ai le Malo, ina ia avatu tupe e faaosofia ai moealuaga i lo tatou Ofisa o Faatoaga ma le mamalu o le aufaifaatoaga, ina ia mafai ona toe atinae mea nei mo le tatou atunuu.

O le tatou polokalame o SACEP, ua ou lagona saunoaga ma le tuualalo a sui, malilie, o leni e tau faapiipii atu po o fea tonu lea e lape ai le auunaga. O lea foi e taumafai e oo lava i le Kapeneta ua talanoa le mea nei, o le tele o mea felavasai o red tapes e taofiofi ai le access o tagata i le polokalame leni. Ua umi foi na faagasolo ae lea ua gaii le Malo ua uma foi ona tatou fai polokalame faalauiloa tatou taumafai e faafaigofie mea faigata, tatou taumafai e faamama ma faamanino mea o nenefu ina ia mafai ona oo tonu fesoasoani leni i lima o tagata o lo o manaomia.

Saunoa se isi sui e uiga i le polokalame o le Women in Business, faafetai i leni faalapopotoga, ou tem atua momoli lau faafetai i le Women in Business. O lo o latou faailoaina le mea nei o le Organic Farm mo faatoaga e ola i lona olaga o le faanatura, ma e le fesiligia o lo o ave foi i ai le fesoasoani a le tatou Matagaluega ma le Malo. O lo o i ai lalo le 35,000 o le tele o faatalatalanoaga ua maea ona matou faia, e faaalualu a ii luma, leni foi auunaga taua a tina o le atunuu, o lo o latou auina atu fua o faatoaga i le isi level of market, e ese mai maketi uma nei o lo o tatou agai ia o tatou tagata, a o le maketi lea, o le maketi paepae. O lo o latou faia fua o faaeleleaga ma gaosi ma avatu e faaoga ai sootaga vavalalata ma le tatou SROS fai ai suesuega o value added, o mea o latou faia, ma ou te tautino atu a, ua maea ona feiloai ma le Pule ma le Matagaluega, ua ou vaai i ataata o tauleleia, ae tatau ona matua ave le lagolago o le tatou Matagaluega ma le Malo, i taumafaiga a nei Faalapopotoga. Taua e nisi ia taou suesuega o le SROS, i o lo o faapena lava ona faasolo tulaga o suesuega, vai taumafa, oloa gaosi e maua ai nisi tau, o le tulaga o le auina atu i fafo o tulaga e faaleleia ai fua o faatoaga e fai ai nisi oloa, mo le auina atu i fafo.

24 IUNI 2016

**Tulafono Tau Faaofi o le Faatatauina o Tupe Faaopopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

O le Matagaluega o Faigafaiva, faafetai i la outou tuualalo, moli auala eseese e mafai ai ona faaleleia le Matagaluega leni. O le tasi leni ivitu ua maitauina mo le lumanai, e le fesiligia le tulaga lena, peitai, e tele foi ma anoanoai faafitauli o lo o feagai ma le Matagaluega. O le tatou osone, e le ato se 200 afe maila, a o lo o anoanoai le tele o faafitauli o tulai mai, i le taumafai lea o latou i le lava o le tamaoaiga i vaa alia e agai i vaa lapopoa, taumafai atu le malo i tausaga ua tea ma aso ua alu, e fai pole fagota, fai Savaii fai iinei. O le mea ua tupu i le aso, ua leai ma se pole o toe tu, leai se pole e tasi o toe tu, ou te le toe tusitusilima pe toe tepa i tua, ua tea lena taimi. O isi na maua i le Ofisa ua faaleagaina, o isi ua maua atu ua tafea e le lelei le faiga, o isi e maua atu e faaletonu ona o afa ma mea na tutupu, lua vaiaso talu ai, ua pasia e le Kapeneta e toe fau pole uma o le atunuu, ua pasia ai le 600,000 e fau ai pole latalata ma pole mamao, 60 pole fou ua uma ona pasi e le Kapeneta ua i lima nei o le Matagaluega o le a fau. E 30 pole mo le gataifale, mo pole foi ia e o i ai le au aloalo, vaa aloalo a tatou, e latou te o i ai e maua aim alai ma mea laititi, ma mea faapena. O pole mamao, e o la i ai le au fai alia ia e toatele i ai le atunuu, e mamafa i ai i latou o lo o faifaiva o le atunuu. O i ina e maua ai le atu, asiase ma ia alalo. O le taimi leni, na ona ofi a o le alia i fafo sue le mea e alu i ai, a o le fuafuaga ua faataatia e le Malo, ma fuafuaga a le Matagaluega, o pole nei, o pole o le a faataatia e manuia ai le aufaifaiva. O le agaga faaoga ai avanoa a o faafofoga mai le aufaifaiva ma le atunuu, Samoa ia outou alofagia mea ia e taumafai atu. E le aafia matagi i se faamatalaga, laufaleaina o latou o lo o e faaleaga mea nei, ae o le faaleaga o mea nei, ia o le a faaleaga la mea ae faapefea ona tua le atunuu? O le agaga ma le faamoemoe, ina ia fai se faiga lelei o fea lava le itumalo o le a i ai lona gataifale le pole, o le tatou matafaioi faatasi, police le pole lea. E talosaga atu ma le agaga maualalo. Ua uma foi ona matou fesootai ma le Matagaluega o Tina ma Tamaitai, Pulenuu ma Sui o le nuu, galulue faatasi aua le faamoemoe leni, aua foi o mea nei o mea a latou, o mea mo le manuia o latou ma le manuia o latou atinae o lo o taumafai e fai.

O lo o ua i le uafu nei i Matautu nisi o kamupani iā ua faatuina, ua outou vaai i le tatou talo le export lea ua i ai, ua ova atu ma le 30miliona le export o mea tau iā. Ua faatalatalanoa le tele o nisi kamupani ua omai nei, e lua kamupani la e ua amata galuega, ua faasolo le latou galuega o le aumaia o iā ma tuu container ma sent ma maua ai le export a le tatou atunuu. Ia, e faapena ona lelei ai letatou tupe maua e ala i le export i mea tau iā.

O le tulaga tau tilapia pei ona saunoa nisi o sui usufono mamalu, o le tulaga foi lena, we have to commercialise ma aumai le tulaga aupito sili ona mafai ona faafailele iā i totonu o ogaelele ma saili mai. Ia o le taimi leni na o le tatou tausasami lava le mea lea e fai, ae o lo o tele se avanoa i le maketi i Niu Sila o lo o faapena ona maua ai le avanoa e lauina atu ai leni tamaoaiga o le atunuu e ala i nisi o fuafuaga.

24 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

O le tulaga i le nonu e pei ona taua e lau tofa Lauofo, ia aua e te atugalua, e le i vale le tatou malaga na alu faapea foi le saasaa a le Tuiatua Faanofonofa i Saina. Ua tatou vaai i le tele ma le anoanoai o fua ua maua mai i lenei taumafaiga, e le i uma le galuega o lea e faasolo pea. E uma loa le iā, nonu loa, o faamaumauga na o lea e statistic ia tatou, e uma loa le iā, nonu loa. O lona uiga, e te le i siva fua lau Tofa Lauofo, na i ai le aoga o le tatou malaga na tatou o ai, o le tulaga lenei e le mafai ai ona taufaatauvaaina, ae leai lava se atinae e aunoa ma se faafitauli. O lou nuu, o la e faafofoga mai lou itumalo, I am the most committed i le mataupu lenei, e 500 eka la e faatali a lou nuu, e ui ina faaletonu le tamalii na sau ma ia, ae le oge auala le Atua, that's my job, ou te alu e saili se mea e faaauau ai le galuega lea. O le ma va ma Peseta, aua tou te popole, Peseta is my brother, yes, na o le Atua n ate iloa le ma mafutaga, ae ona o lea ua i luma o le faamasinoga, o le a ou le oo i ai. Ae na pau lava le tali, o lea ou te maua iinei, e i ai le au tafutafu afi lea e faalogogata ai Peseta. O lea la ou te fautua atu ai Lauofo ma lau afioga Peseta, aua e te lua faaoloataua. A tuu i le fea sao, you have no pisinisi. Tuu ai pea maua ma Peseta e fai le ma tala.

**Tofa Olo Fiti Afoa Vaai (Salega Sasae):** Lau Afioga i le Fofoga Fetalai o se mea e fia faamalamalama. O lea e maitau atu i le saunoaga a le Afioga i le Minisita, matou te talitonu ai na o faiga siva mea ia sa agai ai i o. Na pau lava le nonu lea ou te iloa o lea e faamaonia le alualu lelei, na o le nonu a Peseta. Ia a o le a tuu atu pea le lua faamasinoga po o fea e iu i ai.

**Susuga Hon LAAULI POLATAIVAO LEUATEA:** Ia, aua e te popole, e le o se mea e...

**FOFOGA FETALAI:** Malie le Minisita, se i tulai mai sui usufono mamalu mo Anoamaa Sisifo.

**Tofa Lauofo Fonotoe Nuafesili Pierre Lauofo:** Lau Afioga i le Fofoga Fetalai, o le manaia ia o le saunoaga a le Afioga i le Minisita. E momoli atu le faamalo ma le faafetai. Na pau lava o lea, e leai, ou te le o faaoloataua i le Afioga ia Peseta. A foi lea na faafofoga mai lava le Afioga i le Minisita o ou fai atu, Peseta, tuu ia lenei mea. Ia o ifo ia e faalelei lenei mea ma teuteu i tulaga faapena, ae o le a ou le agai tele foi i ai leaga o la e ua i luma o le faamasinoga. Ae faafetai.

**Susuga Hon LAAULI POLATAIVAO LEUATEA:** Ia, e pei o si au tala lenei.

**FOFOGA FETALAI:** Ia, tulai mai le sui usufono leaga o lea ua taua le suafa....

24 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2) ma le Tulafono Tau Faaofi o le Faatatauina o Tupe 2016/2017 – felafolafoga faaauau i luga o le faitauga faalua**

**Afioga Peseta Vaifou Tevaga (Faasaleleaga Nu.4):** Lau Afioga i le Fofoga Fetalai, ona e faigata na tau mai lava ananafi o lea foi ua toe tau nei. Ou te fautuaina sui usufono mamalu, pei e manaia pe agai i issue ma mataupu, ae aveese pea le igoa o lenei itumalo, leaga o la e faalogologo si ou itumalo. O le fautuaga lea e tatalo atu ai i lau Afioga i le Minisita ma nisi foi o sui usufono mamalu e alofagia le tatou Fono. O se fautuaga lea ma le faaaloalo i lau Afioga i le Fofoga Fetalai.

**Afioga Hon LAAULI POLATAIVAO LEUATEA:** Ia, e le mafai ona ou laaloe ae faamalulu atu i lau Afioga Peseta, leaga o lea ua laga mai o le mataupu e tau ai fua le ta va. Ua uma ona ou ...ua iloa foi taua e fofo alamea le ta mataupu, a o le aualii ia e faalavelave, aua tou te toe faalavelave. Nonu is not the problem, money is not the problem, you are the problem.

**Tofa Lealailepule Rimoni Aiafi (Faleata Sisifo):** Lau Afioga i le Fofoga Fetalai, o lea la ua ou malamalama lau Afioga i le saunoaga a le Minisita mo Leoleo ananafi i le fale fou lea e fai nei, fai ai la ma ni ea malulu i le taimi e gasolo atu ai tatou i uta o lo o malulu lelei nai potu nei. Faafetai.

**Susuga Hon LAAULI POLATAIVAO LEUATEA:** Ia, o le a ou le tapa lea itu lau Afioga, o oe le isi tagata na ona e sau soo lava a o oe le isi tagata ua leva na tataua ona e i uta.

Ia, faatai la ma se leo, le paia e ma le mamalu o le Maota Fono i tuleiga ma saunoaga na outou saunoa i ai, lafo mai lo outou faatuatuaga o le a ma taumafai ma lou soatau. Silasila i lou soatau, o le fetalaiga ia Saleaula e atoia i ai le nofo a Pule, ua uma ona ou fai i ai, na o lou ili lava e aloalo, tuu mai taua e 200 maila i le itula lea o le a ta o ai. O tatalo, o tuleiga ma fautuaga, e sao outou, a o le agaga ia outou alofagia foi le Matagaluega, e le o i ai se atoatoa. Ua uma ona ma feiloai, lau Matagaluega, ia outou faafofoga mai. Ou te le alo i se ata o le laau, aua ne i tatou defensive. O tatou planting material, o tatou koko, o la e ua uma ona ou faatonuina ina ia 500,000 le koko e maua i totonu o le lua vaiaso. O tatou tiapula ia matua faatele a mafai ona fai se miliona, fai. O le tali lena o le mea lea. A o fuafuaga ma lavasiga e le mafai ona tupu mea nei pe a tatou le galulue faatasi. Samoa, ou te faapai malu atu, e manaomia la outou lagolagosua i le galuega, aua e leai se isi e agai i ai, o tatou....

**FOFOGA FETALAI:** Lau Afioga i le Minisita, malie lava o lo o tulai mai le faauilavea a Faleata Sasae.

**Afioga Salausa John Ah Ching (Faleata Sasae):** Lau Afioga i le Fofoga Fetalai, e leai se agaga e faalavelave ae maitau atu o le a faaiuiu le saunoaga a le Afioga i le Minisita. O le mataupu sa ou taua i lau lauga o le ituaiga foi lea o fuafuaga pei se export authority mo fua o tatou faatoaga.



24 IUNI 2016

**Tulafono Tau Faaofi o le Faatatauina o Tupe Faaopopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

Ma lona lua, o le tatou maketi foi lea i Tutuila i tatou manupapalagi, aua o lea ua lelei tatou mobile abbatoirs. Ia, o le faafesili atu lea i lau Afioga. Ma le faaaloalo lava.

**Susuga Hon LAAULI POLATAIVAO LEUATEA:** Faafetai lava i le sui usufono mamalu. O lea sa ou tuua i lalo i lau lisi, sa ou manatu e tali i le tulaga lautele, ae ua ou ava i le saunoaga a Afioga i le Palemia.

O le tatou export authority, o le tulaga lena o la e fai e le Matagaluega i le taimi lenei. A ave le containe i Niu Sila, e avatu uma lava i Nuu pack ai fufulu ma faatulaga ina ia maintain le mea lea o le quality assurance ma le standard control. E le mafai ona tatou tuatalaloa a tatou faifaatoaga e o latou, aua o le iuga e lau ai ma mea faaletonu. A tapuni la le faitotoa, e le tapunia le faitotoa a le aufaifaatoaga ae tapuni Samoa atoa. Faafetai faamanatu, aumaia o le a tilotilo i ai le Matagaluega ma le Malo.

O le tulaga i le mea lea o le abbatoir, yes, ua i ai a tatou fale fasimanu ma ua siitia le tulaga o le fasiga o manu i totonu o le atunuu, ua mama, e o faatasi ma tatou Food Bill ma le Bio-Security Bill o lea e faatulaga nei.

O le tatou maketi i Tutuila, o la e tuitui le faitotoa i le taimi lenei ina ia toe tatala le latou abbatoir, ia toe avatu le tatou povi. O povi masima, o le sosisi puua ma le sosisi povi, ua uma o la e alu faatalanoaga i le taimi lenei o le tatou summary talk, ae lafo mai le faatuatuaga pei ona ou fai atu.

Ia, e faaii sau faamatalaga i lou itumalo lau Afioga i le Fofoga Fetalai, ou te le tuua le nofoa nei ae ou te le i oo i le itumalo i le faaaloalo. Sa Tupua ma Sa Malietoa ma Aiga,ua outou silafia le mea o lo o taoto ai lou fatu. O lou sau i inei i le Maota lenei, o la outou tofa ma la outou faautautaga. E leai sou loto e faia. A uma le Paeaiga lenei ua 15 ou tausaga talu ona ou tulai e ave lo outou leo ma lo outou nofoa. Faafetai i la outou tapuaiga, faafetai i la outou pule, faafetai i la outou faaaloalo.

Na pau lava lea o lau tuualalo, le tatou nuu, ia silasila i le agai i luma o le lumanai. Silasila e ese o tatou loto, ese le mea ua tupu. Ia faamanuia le Atua i le tulai mai o Faaulusau ma te toalua i lenei vaitau, o lo o lauivilu uma i ai itumalo uma e fia maua ni sui usufono se toalua, ae a faamanuiga a le Atua? Tuu lima. E ui i ni nefunefu ma ni galugalu o le amataga, o mea na a le tagata, a o le faataunuuina e le Atua, o lea ua outou faafofoga mai i lona siufofoga ma lona manatu. Ma te tutu faatasi e tauave le galuega mo le itumalo, o lou loto foi lena.

Lau Afioga i le Fofoga Fetalai, o ou mama na, e tumu i le ava atu i le ta va nonofo ai. O le tofa a le matou nuu na ou sau ma au, Laauli, afai e finagalo le Palemene e te toe Fofoga Fetalai, ia e nofo, ae faigata tele le ava atu ma le faaaloalo i lau Afioga. O ou mama na. O le finagalo o le tagata, e le o le finagalo lena o le Atua. Ua ou taunuu mai foi i le filifiliga a le Palemia ma le filifiliga a le Atua mo au, e tele foi le mea e tatau ona ou faia, itø a lot of room for improvement.

24 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

Lou aiga Kapeneta, o ou vae ma ou lima e soosootauau ma tatou galulue faatasi aua le manuia o le atunuu. Ia manuia le faafofoga a Samoa, manuia lenei Palemene. Soifua.

**FOFOGA FETALAI:** Malo faafetai ua logo faatutuila le saunoaga a lau Afioga i le Minisita mo Faatoaga ma Faigafaiva. Ua maua le avanoa o le Afioga i le Minisita mo Tupe Maua e saunoa ai e tusa ai o mataupu sa laga. Ia saunoa ia lau Afioga i le Minisita.

**Afioga Hon TIALAVEA FEA LENIU TIONISIO HUNT (Minisita mo Tupe Maua):** Faafetai i lau Afioga i le Fofoga Fetalai mo le avanoa e taumafai atu ai e tali atu i ni manaoga ma ni manatu o le tatou manatu nei sa tuuina ma ii le matou Matagaluega. O paia o Samoa o le a le oo atu i ai se faamatalaga, o paia mai le vavau e oo i le faavavau e le mafai ona toese e se tasi, ae o le a fagatonu le malama ona o lea e tuli le taimi.

Lau Afioga i le Fofoga Fetalai, ou te masalo o le Matagaluega lenei na o le toalua lava sui usufono sa afea i ni o la finagalo le Matagaluega lenei o Tupe Maua, o le Tofa ia Aumua ma Sulamanaia. Faamalo faafetai mo faamanuiaga sa tuuina mai e a lua afioga mo le Matagaluega aemaise foi le fale o lea ua taumafai ia maua mai le warehouse o lo o i tua ifo o le Ofisa o le Tiute o le a faaoga lea mo le revamp ina o container ina ia mafai ona malupuipuia le aufaigaluega.

Lau Afioga i le Fofoga Fetalai, avea ia lenei taimi e momoli atu ai le faafetai i lau Afioga i le Palemia e tusa foi ma le faatuatuaga na aumai i le sui usufono o lenei itumalo e tauaveina ai tiute ma avea ai ma Minisita o Tupe maua a le tatou atunuu. Aumaia lou faatuatuaga.

Lau Afioga i le Fofoga Fetalai, e tatau ona ave se faamalo i galuega lelei ona fai. Avea lenei avanoa e momoli atu ai le faamalo a lou sui usufono i le tamaitai pule ma le Ofisa o le Tiute i le latou galuega fita sa feagai a ii lenei tausaga faaletupe 2015/2016. I tua atu o tausaga e lua ua tuanai i le 2013/2014, e \$48miliona e le i ausia o le target sa tuu mai e le Treasury. 2014/2015, e \$46miliona foi tupe e le i maua. I le tausaga lenei 2015/2016 seia oo ma ii le aso ananafi, ua 99.4% maua i lenei tausaga, toe \$2,400,000 o lo o totoe i le target o lo o tuli e le Matagaluega. E faamoemoe toe lima aso faigaluega lea e totoe e oo atu i ai ua maua lea target sa tuuina mai e le Treasury mo le aoina o lea seleni. E momoli atu ai le faafetai i le Pulega ma le aufaigaluega mo le galuega fita o lo o feagai ai. O lea ua aumai le tatou tusaga mo le tausaga fou ua faaopoopo mai le \$12miliona, o le luitau lea mo le tatou Matagaluega.

O le sini lava o le faamoemoe o le tatou Matagaluega, ia siitia le soifua manuia o tagata uma, e ala lea i le aoina mai o seleni. E tele taiala o lo o taumafai nei le Pulega ma le aufaigaluega ina ia mafai ona fesoasoani i le faafaigofieina i le aufaipisinisi mo le aoina mai o lafoga.

24 IUNI 2016

**Tulafono Tau Faaofi o le Faatatauina o Tupe Faaopopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

Aua po o le a lava po o fea e sue i ai, o le aufaipisinisi lava o lo o tele ai le tamaoaiga o lo o mafai ona aoina mai i lafoga aemaise foi o tiute i le uafu. Ou te talitonu lau Afioga i le Fofoga Fetalai o se luitau lea ua tuu atu foi i le tamaitai Pule ma le Matagaluega, e le gata i le tupe o lo o taumafai mai le paketi e \$491miliona e sue i le Tala o le Tupe lenei 2016/2017, ae ia maua se \$500,000 e pei o le lui ua aumai e le Komiti o Tupe mo le Matagaluega ia oo le tatou sailiga i le \$500miliona mo le tausaga faaletupe lenei o le a amata i le masina fou. Ou te talitonu e maua lea lui pe a lelei le tatou faipaaga ma le aufaipisinisi aua o latou ia e tatou te faamoemoe i ai.

Lau Afioga i le Fofoga Fetalai, e talitonu o le a foi se manatu ua leai se isi avanoa e totoe ona o lea ua uma manaoga sa tuuina mai e sui usufono aemaise foi le faafetai atu i le Matagaluega, ae se i ou oo ifo i lou itumalo.

Ou te talitonu lou itumalo i le Vaa o Fonoti i le falelua ia Fagaloa ma Faleapuna e momoli atu le faafetai i la outou faaeaea i lo outou sui usufono nei, na aumai a outou faamanuiaga aemaise foi le au ositaulaga ma le aufaigaluega paia o lo o nonomanu aua se manuia o le tatou itumalo, faafetai mo a outou faamanuiaga o lea ua papale ai le tou sui usufono i lenei Paeaiga e aveva ma Minisita o le Kapeneta. E talitonu e le mafai ona fai toatasia le galuega, e faamoemoe atu ia te outou i a outou talosaga ma faamanuiaga e faigofie ai le galuea o lo o matou feagai ai i lenei tausaga.

Lau Afioga i le Fofoga Fetalai, faafetai mo le avanoa, faafetai foi i le Palemene nei. Ia manuia le aso i a tatou fuafuaga mo le agai i luma. Ia manuia.

**FOFOGA FETALAI:** Malo faafetai. Faafetai lava i le saunoaga a le Minisita mo Tupe Maua.

Ia ua avanoa foi le Palemene mo le saunoaga a le Tamaitai Minisita mo Tina ma Tamaitai, Atinae o Nuu, Afioga ma Agafesootai.

**Tofa Hon FAIMALOTOA KIKA IEMAIMA STOWERS (Minisita mo Tina ma Tamaitai, Atinae o Nuu, Afioga ma Agafesootai):** Faafetai i lau Afioga i le Fofoga Fetalai mo le avanoa. Ou te muai faatalofa atu i le paia maualuga o le Maota. Ou te muai faatalofa aloaia atu i lau Afioga i le Fofoga Fetalai i lou tulai mai e faafoe le Maota o Samoa i lenei foi Paeaiga, o ou mama na. Ou te faatalofa atu i le paia maualuga o le aiga Kapeneta, aemaise foi o Minisita Lagolago le paia maualuga o sui usufono mamalu uma o le itumalo o le Maota o Samoa o lo o faapena ona tatou aofia a ii lenei taeao.

E le galo le tapuai mai a Faauluuluga o Matagaluega i alii ma tamaitai, Faauluuluga o Matagaluega a le Malo ma Faalapotopotoga. E faatalofa atu i le Failautusi, le Sui Failautusi aemaise o le paia maualuga a le aufaigaluega a le Maota Fono o lo o lima ma vae e tautuaina a outou Afioga aua le sologa lelei o le tatou Fonotaga i lea taimi ma lea taimi.

24 IUNI 2016

**Tulafono Tau Faaofi o le Faatatauina o Tupe Faaopopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafaiga faaauau i luga o le faitauga faalua**

E faatalofa atu foi i le au faasalalau i leitio, TV ma nusipepa o lo o outou molimoli atu le Fono mamalu a Samoa i maota ma laoa aua le tautuaina o le faafogoga ma le maimoa mai a Samoa o lo o tapuai mai.

E faatalofa foi i le faafogoga tapuai mai a Lana Afioga Mamalu O Le Ao o le Malo ma le Masiofo, ae a le paia maualuga i le Sui o le Fono a Sui Tofia ma a outou Masiofo, o le paia lava lea aua Aiga ma Tama, Tama ma Aiga, le mamalu Tumua ma Pule, Aiga i le Tai ma le Vaa o Fonoti, tainane foi le faafogafoga a Samoa i Sasae, le paia ia Sua ma le Vaifanua, Fofa ma Aitulagi, Saole ma Saleaamua ma le Launiu na Saelua, le Laau na Amotasi ma Auvaa o Tootoo ma upu i le Manuatele.

Ou te faatulou foi i le faafogafoga tapuai mai a feoi o le Talalelei i Ekalesia e fia o lo o faapena ona asu le ipuvai o le ola aua se manuia o Samoa e le gata i la le tino, ae maise i la le agaga.

Lau Afioga i le Fofoga Fetalai, o le a ou agai loa e fai le galuega ua ou tulai ai e avea ai ma sui o le Matagaluega ua tofia ai, le Matagaluega lea o Tina ma Tamaitai, Atinae o Nu'u ma Afioga ma Agafesootai. E le umi foi se faamatalaga aua e le i tele nisi na sausaunoa i le tulaga foi o lenei Matagaluega.

E toalua na saunoa i le ie Samoa po o le tatou iniini, o le sui usufono mo Lefaga ma Faleaseela lea sa fautua mai ina ia saga faatupu tele ma faaauau lenei atinae. Faafetai tele. Ou te talitonu ua ala ona e fautua mai, ona ua suamalie ma lololo i le tou Matagaluega faamanuiaga ua maua mai i lenei atinae. Tatou te ave ai le faafetai a lenei Matagaluega ma le faafogoga mai a Samoa i le Afioga i le Palemia aua o ia sa amatamea, o ia sa faamaite i lenei atinae, o lena ua faapena ona outou silamio i ai, talu ai nei lea sa fai ai le faalelegapepe. Ia ua sao faalalelei, e faafetai ai le itupa o tina ma tamaitai sa limalima i le faatinoina o lenei atinae, ua tele faamanuiaga aemaise o tupe ua maua ai mo le tausia o aiga ma fanau, nuu ma ekalesia ma mea uma o lo o moomia talu ai le faamaite ma le pulunaunau ia manuia lea atinae.

Ia, faatasi ai la ma le sui usufono mamalu mo Vaimauga Sasae, lea sa aumai lona popolega, ua faalogo ua i ai se Saina po o ni Saina ua agai mai e tauanau le totoina o le laufala e avatu i fafo e lalaga mai ai le ie Samoa. Ia, aumaia lou faatuatuaga o lea e faafogafoga atu le Palemia sa amatamea ailoga e tupu lea mea. Aua a ave i fafo, tatou te le faaogaina o le ie Samoa, o le ie Saina. Ia aua le popole ae faapena ona tatou fiafia i lea foi tulaga i lea atinae. Ma nai sui usufono foi sa faapena ona faafetai ma faamalo mai ma faamanuia mai foi i lou tulai mai o le Minsita mo Tina ma Tamaitai, faatasi ai foi ma le sui usufono sa sausaunoa o lea foi ua faafetai i le tofiga ua tulai mai se tamaitai mo le Matagaluega. O lea foi tofiga ua ou tulai atu ai nei i le paia o le Maota e momoli ai, o lo o faafogafoga mai si ou itumalo e momoli ai foi le faafetai tele a lou itumalo ma lou nei tagata faatauvaa i le Afioga i le Palemia i lana tofitofiga ma lana faasoa ua amanaia ai lenei itumalo i Savaii i le saofaiga a le Kapeneta. Faafetai tele le faaloalo o lau pule lea.

24 IUNI 2016

**Tulafono Tau Faaofi o le Faatatauina o Tupe Faaopopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

**FOFOGA FETALAI:** Malie le Minisita se i tulai mai le faauilavea a le sui usufono mo le Itumalo Tu Taulaga.

**Afioga Faumuina Asi Pauli Wayne Fong (Itumalo Tu Taulaga Sisifo):** Sa le fia faalavelave lava i le saunoaga matagofie a le Tamaitai Minisita ae sa afea foi i lau taumafai atu le tulaga i le tofi o nuu e toe tatalo atu, leaga o lo o i ai le matou tofi o le Malo, ae leai se tofi o tamaitai. O lo o faapea o le matou nuu e alu i lalo o le tofi tamaitai o le isi nuu. Ae sa i ai le agaga e aumai faatasi tofi ia e lua. Ia na ona toe tatalo atu i lau Afioga, se i toe tagai ane le tou Ofisa pe le tatau ona aumai foi ma tamaitai, o lo o tele foi tamaitai o lenei nuu. Ma le faaaloalo lava. Faafetai.

**FOFOGA FETALAI:** Malo faafetai. Tulai mai le Minisita.

**Tofa Hon FAIMALOTOA KIKA IEMAIMA STOWERS:** Faafetai tele mo le faauilavea, ae ua vave ona tulai mai le afioga foi i le sui usufono mamalu lau Afioga Faumuina, a o lea e faasolosolo atu mataupu sa outou laga, o lea ua ou oo tonu mai lava i lau Afioga. O lea sa e saunoa mai i tofiga ia, ona o lea sa ou talanoa atu ai ananafi, e matala le faitotoa o le Minisita i taimi uma e leai ni appointment, tatou talatalanoa, faasoa, tufa, o a mea o tutupu mai i lea itumalo ma lea itumalo aua le vafealoai ma le avafatafata e toafilemu ai le atunuu, tatou talanoa. O lo o i ai foi taiala ma faiga faavae a lenei Matagaluega o lo o mulimulitai ai ia tofiga. Ma o ia tofiga mo le silafia e le mamalu, aemaise foi nuu ma afioaga o lo o faafogafoga mai, e le faapea e talanoa atu loa i le Minisita, e leai, e ave le pepa a le Kapeneta i so o se sui, pulenuu, po o sui o le Malo po o sui o le nuu, e sauni le pepa e ala i faamaumauga po o a taatiaga o i ai i tusitusiga ma fautuaga e pei ona tuuina mai ona faatoa ave lea i luga e pasia mai e le Kapeneta a tatou tofiga ia o pulenuu, o sui o le Malo ma sui Tamaitai o nuu.

Ia, ona ou oo mai lea, sa faapena foi ona afea i le saunoaga a le Afioga ia Gatoloaifaana o Faasaleleaga Nu.1 i Sisifo, i le tulaga foi lea pe mafai ona galulue faatasi le Ofisa o le Soifua Maloloina, le Pulega o Tagata Tafafao Maimoa Mai, faapea foi ma lenei Matagaluega i le taumafai lea e tineia le SIKa. Ou te faailoa atu ma le agaga faaaloalo, o le augofie ia o lenei Matagaluega, aua a outou silasila foi ma faafogafoga i le igoa o le Matagaluega, Tina ma Tamaitai, Nuu ma Afioaga ma Agafesootai. O le Matagaluega mo tagata uma, e amata mai lava i fanau faatoa soifua mai i le lalolagi, faasolo ifo i tamaiti, tupulaga, o tina ma tamaitai, seia paia luga i le faamalumaluga o alii ma pulenuu i le fono mamalu a alii ma pulenuu, le fono lea o lo o faapena ona puipuia ma tausia le filemu, le fono mamalu a alii ma faipule, ia se i oo i tama ma tina matutua ua pulapula lagoto le soifua, o tatou uma lava nei o lo o taulai i ai le galuega a lenei Matagaluega. E oo lava i le faafogafoga mai foi a i latou e le atoatoa le malosi o le tino ma le mafaufau, e leai lava ma se tagata e misi, e i ai uma lava i totonu o le Matagaluega lea.

24 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

Ma o le tulaga o lea e talatalanoa ai foi matou nei pe a uma le Kapeneta i le tele o taimi, po o le a le galuega e galulue faatasi ai lea Matagaluega ma lea Matagaluega ma lea Matagaluega ina ia matou oo atu i tua aua le tapuai mai a Samoa i nuu ma afioaga ma faafogafoga mai foi i a tatou mea o fai ma a tatou galuega o faatino, aua e talitonu le manatu ma le mafaufau o a uma lava Matagaluega o lo o tatou galulue ai, e tasi lava le auga, mo le manuia lautele o Samoa nei ma a taeao. Ia o le tulaga lena, atonu pe i ai se mea na pau, ae na pau ia o sui usufono sa talanoa mai ma afea le Matagaluega. Ae ou te faasilasila aloaia atu foi, o lea faatoa amata le tatou Paeaiga, o lea faatoa tolu masina, lafo mai lo outou faatuatuga, o le a faapena ona tuu le tauau o le Matagaluega o Tina ma Tamaitai, e pei a galulue faatasi aoga, le soifua maloloina i galuega uma, ae a palasi faatasi i le o atu lea i tua, aua o lea e molimau mai le Minisita Lagolago o lenei Matagaluega, o le tamaitai pule ma le aufaigaluega, ua le tasi le lua la matou feiloaiga, o lo o uunai, tuu le au tusitusi ma le au fai ripoti ma i latou o lo o vaia tupe, tatou tutu i luga tatou o i tua i mea o lo o sausaunoa mai ai e ala mai i a outou Afioga i alii ma tamaitai faipule o lenei Maota, ina ia tatou iloa po o aoga po o i ai ni mea o fai. O le manaia ia pei ona saunoa soo le Palemia e faamanatu mai i le Kapeneta, o le manaia ia o le iila o pepa o lipoti, mafiafia lipoti, ae i le tilotilo a le Matagaluega, po o galueaiina ma faatino mea o lo o i totonu o nei lipoti.

Ia, o se faapuupuuga lena o se tala a lenei Matagaluega i e sa sausaunoa, ae o lau tatalo pei ona i ai fuafuaga ua faataoote e lenei Matagaluega, i sui usufono mamalu uma lava o le tatou Maota nei, a faasolo atu polokalame o lea o le a matou galulue faatasi ai ma isi Matagaluega pe a outou finagalo malie tatou te o, sui uma o le a faagasolo atu, o le a le mea o le a mafai i lenei tausaga faaletupe i le faasoa a le Minisita o Tupe, o lea tausaga ua oo atu i isi itumalo. E sili ona faasolosolo faapea ina ia tofu silafia o lo o faapena ona faagasolo ma faapena ona i ai se aoga o polokalame eseese e pei foi ona saunoa nei le Minisita mo Faatoaga le Afioga ia Laauli i se tulaga manaia ua faipaaga ai. E tele isi mea aoga aua a alu atu, alu le polokalame a aoga ia, alu le faatoaga, a o la e o isi e asiasi ma vaai i mea ia, ia silafia ai e le sui usufono le tulaga o lo o aafia ai vaega eseese i totonu o le nuu ma le itumalo. Ia o si au faatalauula atu lena. Ina ua maea ai lau Afioga i le Fofoga Fetalai, ou te faanoinoi atu na o sina lua lava minute se i ou oo atu i si ou itumalo i le maea ai o le faiga palota tele ua maea nei.

Ou te momoli atu le faafetai i le aufaigaluega a le Atua o lo o faapena ona nonomanu i totonu o si o matou itumalo, faafetai le tapuai malo la outou tatalo o lo o faapena ona sologa lelei ai totonu o si o tatou itumalo, aemaise aifo i le tapuai mai a o alofaiga si ou nei tagata faatauvaa e tusa ai o la outou tusiaao. Ou te momoli atu le faamalo ma le faafetai tele i le faafogafoga mai a lou itumalo i le faaululuga o si o tatou itumalo ia Safotu ma Manase.

24 IUNI 2016

**Tulafono Tau Faaofi o le Faatatauina o Tupe Faaopopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

O le paia lava lea i le afiio o Sao e Fa, le Aiga Sa Umalau, le Atipouniu ma le Faasau, le mamalu ia te oe le Pule, le alaalatai o le fetalaiiga Lavea na e mua i malae ma e te tausivaatele aua le tupua i Finao. I le susu o Taito ma Aiga Sa Umalau ma le fetalaiiga ia Tauasa. O paia ia o si o tatou itumalo.

Ou te momoli atu foi le faafetai tele i faletua ma tausi, saoa ma augafaapae i le ituvai o tina ma tamaitai, le aumaga ma le malosi o si o tatou itumalo. E le faagaloina foi latou uma o lo o alaala ma papaaao i Upolu nei, malo le galulue malo le tautua i si o tatou itumalo. Faamalo faafetai i le paia o si o tatou itumalo i la outou faaaloalo i la outou faatupu. Faafetai i la outou faaeaea ua outou faatietie ai lenei tagata faatauvaa i le maa salafa e ala i lau puleto ma lau faaaloalo maualuga ua ou pale ai nei e fai ma sui o le tatou itumalo i le Palemene e molimoli atu la outou tofa ma la outou faautaga i totonu o le Maota o Samoa. O la outou pule lea ua ou talisapaia faafatueleele. Le mamalu o si o tatou itumalo, o le a le galo, ae o le a teufatu lau faaaloalo ma lau faaeaea ua aumai nei. Faafetai tele mo a outou faamanuiaga i la tatou feiloaiga. E pei lava ona ou folasia sa lua lava mea sa mamafa i lou nei tagata ina ua ou toe pale mai ma tofia foi e ave ma Minisita o le Kapeneta. E ui ina ou iloa e le i faigofie ae sa mamafa ia te au, ou te toe foi muamua atu ae le i amataina ma ou nofo i le Ofisa e toe faafoi atu le faafetai tele.

O lona lua o mea sa mamafa i le mafafau, ou te toe foi atu ou te aisi i la outou tapuaiga, i la outou tatalo, aemaise o la outou faamanuiaga, faafetai tele le alofa, faafetai tele le agalelei. E faapena foi ona faafetaia le tofa a Lavea po o le Afioga foi ia Natoe i se tauvaga matagofie ma le toafilemu. Faafetai i lau lagolago, faafetai tele.

Ua maua foi lenei avanoa ou te faafetai atu ai i nai ou aiga uma i Samoa nei ma atunuu i fafo, o uo ma e masani, po o le a lava le mea sa tatou galulue faatasi ai ma lagolago mai, faafetai tele le alofa ma le agalelei. E faapena foi isi o matou aiga aemaise le fanau pele sa faapena ona lagolago malosi i vaega uma aua le faamoemoe. Ia tapuai maia lou itumalo e, lafo maia lo outou faatuatuaga e pei ona outou toe tofia ai lenei tagata faatauvaa, o le a faapena ona lima ma vae. E le galo outou i taimi uma. A o sina tala a lenei itumalo, faafetai i lau Afioga i le Minisita o Tupe, e le toe umi se tala, o lo o tuli le tatou taimi i toa le tatou galuega ae o lo o tele galuega o lo o faagasolo mai e momoli mai le faafetai a lou itumalo e ala mai i lou nei tagata i le sausaunoaga manino i le faamalamalamaina o le tatou Tala o le Tupe. Faafetai, malo le faasoaa, e le tau selu atu, ua loa ona e galue i totonu o le Ofisa o Tupe ma e tautua ai, ua leai se vaipanoa e te le o silafia, faafetai i le Atua ma lana meaalofa, o oe mo le fesoasoani foi ia Samoa ma ana galuega aua le atinae manuia o si o tatou atunuu.

Ia o le tala lea lau Afioga i le Fofoga Fetalai, ia o le a seu i fanua se faamatalaga a lenei sui usufono. Ia lagi e mama ma faafualoa e le Atua le soifua tapuai o Lana Afioga Mamalu O Le Ao o le Malo, Sui o le Fono a Sui Tofia ma Masifofo, ni ao gasolo aua le tapuaiga i le mamalu o Samoa.

24 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2) ma le Tulafono Tau Faaofi o le Faatatauina o Tupe 2016/2017 – felafolafoga faaauau i luga o le faitauga faalua**

Ia mama le lagi i lau Afioga i le Fofoga Fetalai, le soifua manuia i lau Afioga i le Palemia, le Kapeneta, sui usufono mamalu uma o Ienei Maota o Samoa. Ia manuteleina le tapuaiga a si ou itumalo, aemaise Samoa faafogafoga, ae ola i le alofa ma le agalelei o le Atua. Soifua.

**FOFOGA FETALAI:** Malo faafetai. Ua maea le saunoaga a le Minisita mo Tina ma Tamaitai, Atinae o Nu'u, Afioga ma Agafesootai. Ia ma ua oo mai le faasologa i le Minisita mo le Tamaoaiga, le Minisita o Tupe. Ia tulai maia lau Afioga e saunoa.

**Afioga Hon SILI EPA TUIOTI (Minisita o Tupe):** Lau Afioga i le Fofoga Fetalai, faafetai tele mo le avanoa. Talu ai ona o le faasaina o le tatou taimi, e le umi foi se faamatalaga. E muamua ona momoli atu le faafetai tele i sui usufono mamalu o le Palemene mo a outou saunoaga matagofie e faatatau i le Lauga o le Tala o le Tupe a le tatou Malo mo le tausaga 2016/2017. E pei ona taua i le aso na folasia ai le lauga, o le Tala o le Tupe, o le Tala o le Tupe a le Malo atoa sa soalaupule ma iloilo totoa i ai le Afioga i le Palemia ma le Kapeneta ma sa fesoasoani mai foi i ai fautuaga mai Ofisa Sili o Pulega ma Faalapotopotoga Tumaoti a le Malo ina ia mautinoa ua afea uma vaega taua o le tatou tamaoaiga ina ia mafai ai ona fausia se atinae mautu ma se lumanai manuia mo Samoa atoa. Faafetai i la outou lagolago, faafetai foi i manatu na faaalua ma fautuaga i nisi o vaega o le Tala o le Tupe e saga faaleleia ai a tatou auunaga ina ia faapea ona tatou tali atu i auunaga o lo o manaomia e o tatou tagata. E maitauina foi ua lagolago atoa e le Komiti o Tupe Maua ma Tupe Totogi le Tala o le Tupe. E momoli atu ai le faafetai tele i lau Afioga i le Taitaifono o le Komiti faapea sui usufono o le Komiti.

Lau Afioga i le Fofoga Fetalai, o le po anapo lea sa saunoa le Afioga i le Palemia e faamalalama atili le ootoga o le faataatiaga o le Tala o le Tupe. E pau nai vaega ou te toe faaopoopo i ai, o le tulaga lea o le tatou tupe faasili ma tulaga na laga e nisi o sui usufono i le nogatupe mai fafo ma nai isi tulaga e pei o le tuai ona totogi o aitalafu a le Malo.

Lau Afioga i le Fofoga Fetalai, e taua tele le tulaga lea o le i ai o se tatou tupe faasili. O lo o ua faataatia e \$23.6miliona le tupe faasili ua i ai i totonu o le Tala o le Tupe mo le tausaga fou. O le taua o le i ai o se tupe faasili, muamua, e tatau lava ona i ai se tatou teugatupe po o se faaputugatupe tatou te tagolima i ai i taimi e afaina ai lo tatou atunuu ma lo tatou tamaoaiga ona o ni faalavelave ma ni afaina e le gata i faalavelave faalenatura, ae faapea foi i fesuiaiga o le tamaoaiga o le lalolagi aemaise tamaoaiga o atunuu ma Malo o lo o tatou faipaaga.

Lona lua, o le taua o le i ai o se tatou tupe faasili, o le a mafai ona tatou faatupeina ai nisi o atinae po o ni galuega ua ave i ai le faamuamua ma le faatauaina e le i fuafuaina i le taimi na tapenaina ai le tatou Tala o le Tupe i le amataga o le tausaga nei.



24 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

O lona uiga, o lo o i ai lava le avanoa i le tatou Malo a faapea e tulai mai nisi atinae taua ma ua tatau ona ave i ai le faamuamua, a o lo o i ai le tatou tupe faasili o lo o i ai e mafai ona fesoasoani e faatupeina ai vaega ia, e ese mai le tatou tupe ua fuafuaina mo le faaalu e le fuafuaina, po o le unauthorised expenditure.

Ma le lona tolu, o le i ai foi o tatou tupe faasili faapea, o le a maua ai le avanoa e mafai ai ona tatou toe tagai pe le tatau ona vave faaitiitia a tatou aitalafu i le faapea ona vave totogi atu. E pei o le tulaga lea e taua le toe faaopoopo atu ai i le faamalamalamaga a le Afioga i le Palemia i le po anapo.

O lona lua o mataupu lautele sa laga, o le tulaga lea i nogatupe. Pei ona taua i le lauga o le Tala o le Tupe, o le maualuga o lo o i ai tatou nogatupe i le taimi lenei, o le mafuaaga ona ua i ai i le tulaga ua tatau ona fai ni nogatupe i lena taimi e tali atu ai i le toe faaleleia o aseta a le Malo ma fesoasoani ai i pisinisi ma o tatou tagata i le afaina talu ai le lologa ma le afa lea o Evani, e pei ona silafia sa tele se faaleagaina ai o le tele o tatou aseta taua e pei o le auala, o le eletise, o vai, e faapena foi le fesoasoani atu i pisinisi sa afaina. O le tulaga lena e moni lava foi o lo o tatou taofiofi ma fuafua lelei a tatou nogatupe, ae i ai le taimi e alagata ai ona tagolima le Malo i tulaga ia o nogatupe ina ia aua ne i afaina le tamaoiga, ia faaleleia aseta ina ia mafai ona tatou tali atu i manaoga o tatou tagata.

O lo o faataatia lava le fua latou ia, e tatau ona 50% o le tatou GDP e tatau ona i ai tatou nogatupe mai fafo, ae tatau foi ona i le Malo le flexibility e mafai ai ona toe saili nisi tupe nono mai fafo pe afai ua manaomia e lagolago ai le atinae o le tatou tamaoiga.

O le isi foi itu, e tatau ona tatou tagai i le faaaogaina lelei ma le faatinoina o atinae tetele a le tatou Malo o lo o faatupe mai nogatupe nei, aua a lelei faatino ma maua uma tulaga na tatau ai ona tatou manaomia nogatupe nei, o le a faapena ona toe fesoasoani lava atinae nei e toe totogia tatou aitalafu lea e i ai nei. O le faanaunaga foi lena i le Malo i le tulaga ina ia toe tagatagai i le capacity o lo o i ai i totonu o tatou Matagaluega ma Faalapotopotoga ina ia faapena ona lelei ma mautu le faaaogaina o nei tupe, ia faataunuu ma faavave maea atinae o lo o lagolagoina nei vaegatupe ina ia faapena ona maua e le tatou atunuu faamanuiaga mo nogatupe nei.

Lau Afioga i le Fofoga Fetalai, sa laga foi tulaga ia i mea o aitalafu a kamupani ma pisinisi i le Malo. Ou te masalo tasi lenei vaega e pei ona folasia i le Tala o le Tupe o lo o toe tagai i ai le Malo ina ia faafaigofie ma faavave ona toe faafoi atu tupe, aemaise lava i pisinisi laiti. Ua uma foi ona talanoa i le Matagaluega o Tupe e moni lava o lo o faapea o lo o i ai le faiga faavae e 14 aso e tatau ona iloiloina, ae i lou manatu, e tatau ona o le taimi lava e taunuu uma atu ai pepa ma ua uma ona siakiina ua sao ma ua i ai vaegatupe, e leai se mafuaaga tatau o le a faatalitali ai i le fitu aso. E tatau ona toe vave ona toe totogiina atu, aemaise lava i a tatou pisinisi laiti i nuu i tua, o lo o tele ina faaaogaina e Matagaluega i a latou auaunaga.

24 IUNI 2016

**Tulafono Tau Faaofi o le Faatatauina o Tupe Faaopopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

Lau Afioga i le Fofoga Fetalai, masalo o le luitau tele lava mo i tatou uma o le tatou taumafai ina ia tatou galulue faatasi i le faatinoina o a tatou fuafuaga i se tulaga aupito sili ona lelei ma maopopo. E leai se aoga e manaia ai tatou fuafuaga ae le lelei le faatinoina. Ia vave faatino atinae ua ave i ai le faamuamua a le Malo mo le soifua manuia o le tatou atunuu ma se tamaoaiga alualu i luma mo Samoa ma tupulaga o lo o fai mai.

Lau Afioga i le Fofoga Fetalai, e fia faaoga lenei avanoa e momoli atu ai le faafetai tele i Ofisa Sili o Pulega faapea foi Faalapotopotoga Tumaoti a le tatou Malo mo galuega lelei o lo o faatino ma o lo o faaauau pea le faatinoga ina ia mafai ona tatou fesoasoani atu ma faaleleia atili, e le gata i le tamaoaiga a o le service delivery i o tatou tagata.

E momoli atu le faafetai faapitoa i le Ofisa Sili o Pulega o le Matagaluega o Tupe e faapea le aufaigaluega a le Matagaluega o Tupe, o i latou ia ua leva ona galulue e amata mai lava ia Oketopa i le tausaga talu ai i le tapenaina ma le tuufaatasia o le Tala o le Tupe ua i o outou luma. O le mea mautinoa o le taumafaiga ina ia faapena ona siisii i luga le tulaga o le auunaga a le Matagaluega nei, aemaise foi o Matagaluega o lo o i lalo o lau portfolio. E pau le mea e faafiafiaina ai, e leai se faitio pe leai foi ni popolega i le auunaga i le tele o Matagaluega o lo o i lalo o lenei portfolio e pei o le Faletupe Tutotonu, le NPF, o le Faletupe o Atinae, le SLAC ma le UTOs ma i latou na.

Lau Afioga i le Fofoga Fetalai, masalo na o le pau ia o ni vaega i le aotelega. E momoli atu foi le faafetai tele mo ni fautuaga tuuina mai. Masalo o nei fautuaga o le a fesoasoani tele lea i le Malo, i le Kapeneta, i uso a Minisita ina ia faapea ona toe iloilo ai ma toe vaavaai i a tatou faiga faavae o lo o i ai nei ina ia faaleleia atili, ina ia faigofie ma faaleleia atili le auunaga mo tatou tagata. E pei o se faataitaiga, sa tele foi ni finagalo faaalua i tulaga ia tau auala galue, atonu o fautuaga na aumai, e mafai ai foi ona tilotilo i ni faiga faavae, ni taiala e fua i ai pe prioritise i le faatulaga i le faatauaina, po o ai itumalo e tatau ona faamuamua. E tatau ona fua i le tulaga o itumalo o lo o galulue ai atinae ma faatoaga, ae tatau ona ave i ai le faamuamua ina ogatasi ai ma le taumafaiga ina iaf aapea ona faateleina ni a tatou oloa e auina atu i fafo. Ae faafetai tele, ua maea ona faamaumau le tele o fautuaga taua, e ono fesoasoani ai i le toe faaleleia o le tatou auunaga.

Lau Afioga i le Fofoga Fetalai, ua uma ona faapai atu foi i le itumalo ma le matou nuu i Salelologa i le aso na fai ai le lauga, ae toe avea ia lenei avanoa taua e momoli atu ai le faafetai tele i lo outou lagolagoina ma lo outou talitonuina o lenei tagata faatauvaa e avea ma sui usufono o le tatou afioaga i totonu o le Palemene o Samoa. O le tofiga foi ua i ai nei mai le Atua e auala mai i le Afioga i le Palemia, o le Minisita o Tupe, lou itumalo e, o lo tatou tofi lena tatou te tautua ma auauna ai ia Samoa ma ona tagata. O lea ou te tatalo atu ai ina ia faapea ona outou tatalo mai pea ma lagolago mai ina ia faigofie le galuega faifaatasi.

24 IUNI 2016

**Tulafono Tau Faaofi o le Faatatauina o Tupe Faaopopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

Ia fesoasoani mai le Atua e foai mai lona potu ma le faautauta ma le lotu faamaualalo ina ia faapea ona tatou faatinoina ai ona tofiga ma galuega ua valaauina ai. Viia le Atua, faafetai i lau Afioga i le Fofoga Fetalai mo le avanoa.

**FOFOGA FETALAI:** Malo faafetai, faafetai tapena i lau Afioga i le Minisita o Tupe. Ia, o le avanoa leni e tapa ma le faaaloalo lau Afioga i le Minisita mo Aoga, Taaloga ma Aganuu.

**Afioga Hon LOAU SOLA KENETI SIO (Minisita mo Aoga, Taaloga ma Aganuu):** Lau Afioga i le Fofoga Fetalai ma le mamalu o le Maota, faapea sui usufono o le Palemene, ua ou tulai atu ma le ava tele ma le migao i leni taeao i le faagasologa o le tatou galuega e tali i mataupu ua faapena ona laga e sui usufono o le Maota nei, lea sa faapena ona afea ai le Matagaluega o Aoga, Taaloga ma Aganuu. O le mea lea si ou itumalo Sagaga le Falefa, tapuai maia ma le manuia aua faiva o leni taeao.

Ae le i auiliiliina atu le tali a leni Matagaluega, e muamua lava ona ou lalalo tofi o le moana ma lalagi sugalu o fisaga o tupu, aua o le afuaga o le lagimua, o le pupula mua ma le moemoe mataala o le gagaae seia paia le pupula mou ma le lau magumagu o le gagaifo o le soifuaga ua maea ona tapaga ma mamanu e le Atua soifua. Faafetai i le tapuaiga a Samoa ma leni Palemene aemaise le atunuu ua tatou molimauina i aso uma. O se faamanuiaga o le tatou tofi ma le pale.

Lau Afioga i le Fofoga Fetalai, ona ou talii lea ae popole ne i viligia tapu e pei o le upu i le laau na taoto i le papa, e faigata ou paia ma ou mamalu. Ou te manatu foi o lea ua uma ona faalepa paia, o sa ma taeao o leni Maota. E le toe aufagaina i se faamatalaga a lou nei sui usufono. Talu ai o lo o faapena ona fia tele se faamatalaga e fai, ae talofa o lo o saisaitia lauulu o Taemanutavae ona o le Tala Faatatau o le Tupe, aua a le pasia le Tala Faatatau o le Tupe, ia, e le mafai foi ona faataunuu a tatou galuega ma mea o lo o finagalo i ai sui usufono.

Ona manatu lea, o le a ou tali atu i nisi o manaoga foi aemaise o fautuaga e pei ona tuuina mai e sui usufono e ala i leni Matagaluega. E tusa ma le 27 sui usufono na faapena ona aumai a latou fautuaga aemaise foi o le afea o leni Matagaluega i manaoga o itumalo taitasi. E 27. A faapea la e 27, lona uiga e 23 ua maea ona faatino o latou manaoga.

Lau Afioga i le Fofoga Fetalai, o manatu na faaalua ma finagalo na afea leni Matagaluega, ia, o le 1 lava o faiaoga, o pili aoga o fanau i le NUS, o le faaagaina o le grant scheme o lo o fesoasoani i alo ma fanau ma le faafocina o tatou aoga, o le toe lalagaina o taaloga, o le fausiaina o malae taalo o aoga ma nuu, o faleaoga e toe fia fausia, ia o le silasila o le Pulega ma le Matagaluega i le sewing pe tatau ona toe fai, o misa a tamaiti aoga, ma fautuaga pe tatau ona toe introduce le punishment po o le sasa o tamaiti.

24 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

O Asiasi Aoga, o le APTC mo Savaii, po o le Vocational School D-vet aua le motu i Salafai.

O fautuaga nei ua faapena ona outou tuuina mai, e momoli atu ai le agaga faafetai i sui usufono uma o le Maota sa faapena ona afea lenei Matagaluega i a outou fautuaga. E talia ma le agaga mauualalo, e sao lelei outou i le tele o tou fautuaga ua aumai aua le faaleleia o lenei Matagaluega. A outou silasila mai i le diary lenei, e tumu lelei i a outou fautuaga, o le a faapena ona silasila i ai le Matagaluega.

O le tulaga lea ua tatou ola ai i le lalolagi lenei, o le world of technology, ioe, o lona uiga ua tataua ona outou access i le internet e faapena ai ona vave a tatou fesootaiga. O le mea lea, le paia i sui usufono mamalu o le Maota, o lona le tali a le Minisita, oo i le taeao, alafai i le taeao, ta le 6 tatala lau internet, tatala lau imeli, silasila i ai i le tali ua avatu e le Matagaluega, leaga o au lea ua ou i le Ofisa o Aoga, o i ina o lo o faapolokalame atu ai, ioe. Faaaoga le broadband, le wifi, ioe, o le tekonolosi lona ua tatou ola ai i le taimi lenei. O le mea lea, aua tou te popole. O lea foi ua ou faalogo atu ua outou faalagala au, e tele lava faalagala ua outou faalagala ai au, o le po anapo ma le aso ananafi. O lona uiga, e taua tele au ia outou, e faapena foi au, e taua tele outou ia te au. O le mea lea, tuu mai lo outou faatuatua aua taumafai, a o fautuaga ua aumai, e talia ma le agaga mauualalo. Ia tatou talanoa i le imeli, momoli atu le tali ma momoli mai foi a outou fautuaga. A tuai, fesili mai ia Loau, Loau, o le a ea le mea ua tuai ai le mea lea? Ia ona ou omiomi foi lea, e ala ona tuai, e le lava a tatou tupe po ua ala ona tuai, o lea e fai le mea lea. O le mea lea, ia toa le tai, ae ou te manatu e tataua ona fai aua lenei Paeaiga ia faatino mea uma ua outou mananao ai. Ia....

**Afioga Faumuina Asi Pauli Wayne Fong:** Lau Afioga i le Fofoga Fetalai.....

**FOFOGA FETALAI:** Malie le sui usufono ona o lea e tulai mai le sui usufono mo le Itumalo Tu Taulaga, tulai mai le sui usufono e faapuupuua mai lou finagalo.

**Afioga Faumuina Asi Pauli Wayne Fong:** E puupuua lava. E momoli atu le faafetai tele i lau Afioga i le Minisita mo le taumafai mai foi. E faamalulu atu foi ona o le matou aoga i Vaigaga e leai se imeli, e le i oo atu foi i ai le tulaga o tekonolosi. Ae faigofie lava si au mataupu na avatu e uiga i grant. O mea ia o arrears o paipa ma pili o moli, a tuua le aoga e le mafai ona totogi ona ua tuua le aoga, ae a oo i le taimi e totogi atu ai, ae fai mai e totogi e Komiti le tulaga lea, ae le faapea ua le totogia ona ua le totogia, ae ua tuua le aoga ua le maua. E leai se tupe a le Komiti o Aoga, o lo o taumafai e fai isi tulaga i le faleaoga, ae se i tagai ane lava i ai lau Afioga, pe le mafai ona faaavanoa tulaga ia ina ia totogi pea e le grant. Ma le faaaloalo lava. Faafetai.

24 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2) ma le Tulafono Tau Faaofi o le Faatatauina o Tupe 2016/2017 – felafolafaiga faaauau i luga o le faitauga faalua**

**Afioga LOAU SOLA KENETI SIO:** Faafetai atu i le sui usufono e tusa ma le faauilavea. Atonu e le o lelei le tou fesootaiga ma la outou Komiti ma le Pule Aoga. O le grant lea, e 30% o le grant lea o lo o faapena ona faataatia mo le maintenance ma mea uma ia e te saunoa i ai. O lona uiga, afai o i ai se faaletonu, ia, se i e tagai ane la i le vaega lea aua e 30% o lo o faaagaaga o le vaega lea, aua mea ia e te taua.

**FOFOGA FETALAI:** Ia, se i toe tuu atu le avanoa i le sui usufono. Saunoa le sui usufono mo le Itumalo Tu Taulaga i Sisifo.

**Afioga Faumuina Asi Pauli Wayne Fong:** Lau Afioga i le Fofoga Fetalai, e leai se agaga e faafinauina lenei mataupu. Mo le silafia e lau Afioga, o au nei o le Komiti o Aoga, o lea ou te talanoa atu i le tulaga lea o i ai. E le o afaina le 30% ae afaina le arrears pe a le totagia. E leai se tupe a matou ua uma ona tuu i totonu o le polokalame, ae a misi loa ona totogi, e le faapea o le le totagia, ae ona ua tuua le aoga e le o maua le pili i le taimi lea. Ma le faaaloalo lava. Faafetai.

**FOFOGA FETALAI:** Mo le fia faasaoina o le taimi o le Minisita, se i tulai mai le sui usufono mo Palauli Sasae.

**Afioga Tuifaasisina Misa Lisati Leleisiuao Palemene (Palauli Sasae):** Lau Afioga i le Fofoga Fetalai, e leai se agaga e faalavelave i le saunoaga a le Minisita. Na pau o lea, faafetai mo le folasaga. Ae sa taua foi e Palauli Sasae le polokalame lea ua agai tonu mai ai le Afioga i le Minisita i le Polokalame lea o le faaogaina o le broadband i lona atoatoa ma le tatau. Ae faafetai masalo e aiga tutusa lava ma le agaga o Palauli Sasae, i le TV foi lele e faafesagai ai e fesoasoani mo faiaoga faasaaienisi. O matou mai Savaii, e pei o le naunautaga lava o le omai iinei, o iinei lea e i ai faiaoga lelei. A fai atu lava foi i le TV ia aoga ona fesoasoani atu ai lea i lea tulaga, ona o le tulaga faapitoa e uiga i faiaoga.

Ma le faaaloalo lava.

**Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoui:** Lau Afioga i le Fofoga Fetalai, o au foi ou te Taitaifono o le Komiti o le matou aoga i Lepa, ae sao le mea la e fai mai ai o. Ona ou toe fesili lea i le Komiti, afai la e tuai ona totogi ona ua tuua le aoga, o le a la le mea e fai? Ona fai mai lava lea o le tamaitiiti, totogi e le i tuua le aoga, ou fai atu, oAlu e fai le mea le la.ö

**FOFOGA FETALAI:** E faamalulu atu i le Afioga i le Minisita. Se i tulai mai le sui usufono mo Falealili.

24 IUNI 2016

**Tulafono Tau Faaofi o le Faatatauina o Tupe Faaopopo (Nu. 2) ma le Tulafono Tau Faaofi o le Faatatauina o Tupe 2016/2017 – felafolafaiga faaauau i luga o le faitauga faalua**

**Afioga Fuimaono Teo Samuelu Teo (Falealili Sasae):** Lau Afioga i le Fofoga Fetalai, e leai se manatu e faalavelaveina le saunoaga matagofie a lau Afioga, e talitonuina le agaga e momoli le faafetai tele. O lea na e saunoa i le tele o ou suafa ua faasuafaina ai oe e le Maota, o Eseta, o oe o le toa, o le perofeta, o le tama saosaoa, o le tali malosi. E mafai ona matou tali mai uma i manaoga ia pe a fai e i ai se computer a le aoga, e le i oo atu i ai se mea faapea i lou itumalo i Falealili Sasae. A faapea la e moomia le fesootaiga lea, o le taimi lava e te afio atu ai e sua le ta malae ma avatu ai ma matou ma se ta computer faamolemole. Ma le agaga faaaloalo.

**FOFOGA FETALAI:** Ia, masalo o lea ua maua le tulaga e pei ona toe tatou mai sui usufono. Tulai mai lau Afioga i le Minisita mo Aoga, Taaloga ma Aganuu.

**Afioga LOAU SOLA KENETI SIO:** Lau Afioga i le Fofoga Fetalai, faafetai lava i le lagalaga o sui usufono. O le sui usufono mataala e vaai uma mea ia. O le scheme lea e alu atu nei a le tatou Malo, e cover uma ai mea na tou te saunoa mai ai, o computer, o templates, o ipad, ipod. E cover uma a i totonu o le scheme lea. Afai la e le i oo atu le... e i ai la le faaletonu lea e i ai, lona uiga e mafua mai i le sui usufono, e le mataala. O le taumafaiga lena, we are living in the world of technology, e tataua ona tatou access i ai. Afai e te le iloa faaoga le imeli, e sese le lalolagi lea e te i ai i le taimi lenei. Ia, e pei o nai fautuaga ia.

**FOFOGA FETALAI:** O le faauilavea mulimuli lea lau Afioga i le Minisita mo Aoga.

**Afioga Tofa Foleni Lio Tama Galu (Faasaleleaga Nu. 3):** Faafetai. I le faaogaina o computer ma... ae i ai la le mea lena e misi i tua, no training aua e leai se uiga o le lau atu ae no training. E muamua la fai le training lea mo faiaoga po o ai, ona avatu lea, aua o mea nei o la e foi e taatitia i tua, e le iloa e tamaiti, leiloa e faiaoga, no experience. Ae ina ne i te i ua tatou saosaoa i mea ia ae tataua lava ona fai le training lelei ona faigofie lava lea o mea uma. E pei o le fesoasoani atu ea i lau Afioga, ae faafetai.

**Afioga LOAU SOLA KENETI SIO:** Faafetai mo le faauilavea a si ou uso, o lena e te lua fesootai ifo lava ma lau Sui Minisita lena e i ou autafa e tali lava i ina le lua mataupu. Ae ui i lea, e taua le faauilavea. Afai e te le i aoga ai, aoga ai, alu e sue le aoga e aoga ai.

Ia masalo na pau ia o nai mataupu na laga lau Afioga i le Fofoga Fetalai. E tele isi taimi tatou te talanoa ai i tua i le tatou ti taumafai, ia pe sao ai le Afioga i le Tamaitai Minisita, ia e tatala lava le faitotoa o le Minisita, e le tau faia sau appointment. Afio atu ma tala atu aao tatou te talanoa i ni mea o lo o faapena ona moomia e faaleleia o lou itumalo.

24 IUNI 2016

**Tulafono Tau Faaofi o le Faatatauina o Tupe Faaopopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoaiga faaauau i luga o le faitauga faalua**

Ia, ona ou manatu lea lau Afioga i le Fofoga Fetalai, na o si tamai taimi lava ou te oo atu ai i si ou itumalo o la e faafofoga mai toeiina. O le mea lea, Sagaga le Falefa, e le tau faalagia oe ua e masani, leaga o oe o le uluai aiga o le Malietoa, e toala fanau tama oe i le Malietoa. O le mea lea, le paia i Aiga e tolu, lau fetalaiaga Luatua ma lou gautaala, le mamalu foi i le faletolu faapea lea itu o le vai aua Fogaa, i le faafofogaaga a lau Afioga i le Toetaufanua Telea, faafetai o lea ua matou maitau atu ua toe fai lou maota. Ia faalelei lou aiga ma faalelei le lua misa ma lena tama o Panoa pe a o faalogologo mai. Malo tapena, malo tapuai, malo faitatalo. Mai lava i Niuvai seia paia Fogaa i le afaigaluega tofofi a le Atua, faafetai le fai tatalo, ioe. O lena e silafia lelei sa ou tulai mai i le isi lima tausaga o le Paeaiaga, ia ona ou alu ai lea toe fai sau malologa, o lea foi ua ou toe sau, ona o le a? O la outou faatuatuaga, faafetai tele le amanaia, ua ou ula, ua ou pale, ua ou titi.

O si ou nuu lea o Aele, Aele, o upu lava o le pese a Avele, e le galo oe si ou nuu pele. Aele, e le galo oe Aele i la outou tapuaiga, i le afifio o alii e Fa, le toafa o tulafale, le mamalu o le saofaiga ma upu ia te oe Tuiaele. Ia o faalupega na o si ou nuu. O lea o le a faamauiina o outou faalupega, ua uma ona ma talanoa ma le Afioga i le Minisita, o le a fai a outou faalupega ma tuu i totonu o le tusi faalupega a le tatou Malo, aemaise ai nai ou pitonuu o Nuu, o Tafaigata i le mea o lo o i ai le aai o Sala, ia, aemaise ai o si ou nuu i Aleisa. O le nuu lea o lena foi tou te silafia. E ui i lea, Aleisa, ia I am your man, I will serve you to the best ability I can. Leaga o si o matou nuu lea e totolua tagata e tau le iloa faa-Samoa. O le mea foi la lea e tatau ai ona fai ma ou nanu lau Afioga i le Fofoga Fetalai. E ui i lea, o le tala atu lena. A o le agaga o le Tala Faatatau o le Tupe, e lagolagoina e lena sui usufono lau Afioga i le Minisita o Tupe. Faafetai atu i le tapenaga, aemaise ai foi o le Taitaifono o le Komiti o Tupe, malo le tapena ua faapena ona matagofie.

Ia saunia e le Atua toega aua se auaunaga vaivai ae a maea galuega ona faapea ifo lea, o oe lava o le auauna le aoga. Ia Leala, o le tala i le itulagi lea, a o le tala a Loau, afai e galo oe i lou lima taumatua, e te ono lavea i lou lima agavale. Ia manuia tele le Fono.

**FOFOGA FETALAI:** Malo faafetai. Ia ma ua tatou toai taunuu foi i le taimi o le tatou malologa.

Ou te faasilasila atu o le a faataatiaese Galuega a le Fono Aoao mo lana malologa e 15 minute.

*Na faataatiaese Taualumaga a le Fono Aoao mo lana malologa masani i le itula e 10:44 ma toe amatalia i le itula e 11:23 i le taeao.*

24 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafaiga faaauau i luga o le faitauga faalua**

*Na toe faaauau felafolafaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu. 2) 2015/2016 ma le Tulafono Tau Faaofi o le Faatatauina o Tupe 2016/2017.*

**FOFOGA FETALAI:** Ou te faasilasila atu ua toe amatalia Tualumaga a le Fono Aoao Faitulafono. Ou te manatu ua maua le isi malosī faaopoopo i le paia o le Palemene e faaauau ai le tatou galuega. Faafetai.

Ae le i tuuina atu le avanoa i le Minisita e sosoo ai mo Faamasinoga ma Pulega Tau Faamasinoga, ou te muai tapa se finagalo o le Palemia mo se lafo.

**LAFO MO LE FAAAUAUINA O ITULA FONO**

**Susuga Hon TUILAEP AUELUA FATIALOFA LUPESOLIAI LOLOFIETELE AIONO NEIOTI GALUMALEMANA DR. SAILELE MALIELEGAOI:** Lau Afioga i le Fofoga Fetalai e pei lava ona silafia le faanaunautaiga ina ia taumafai e faamaea le tatou Tala o le Tupe i le aso, e ui o le aso puupuu lenei. O lea ou te faatu ai le lafo, *Ina ia faaauau Itula Fono i le aso seia oo lava ina pasia le Tala o le Tupe ona tatou faatoa malolo ai lea nanei i se taimi o le po.*

*Faaluaaina e le Minisita Pisinisi, Alamanuia ma Leipa ma le Minisita mo Tupe Maua.*

*Na faamaonia le lafo.*

**FOFOGA FETALAI:** Ma o le avanoa lenei ou te tapa ma le faaalalo lau Afioga i le Minisita mo Faamasinoga ma Pulega Tau Faamasinoga.

**Afioga Hon FAAOLESA KATOPAU T. AINUU (Minisita mo Faamasinoga ma Pulega Tau Faamasinoga):** Lau Afioga i le Fofoga Fetalai o le Fono Aoao Faitulafono a Samoa, ou te tulai atu i le agaga maualalo ma le faaalalo tele e tata ai ona o le avanoa ua maua e lou nei sui usufono faatauvaa e taumafai atu ai se sao o lou itumalo o Vaimauga Sisifo Nu.2 po o Vaimauga le Sagauga i le Paeaiga Lona XVI lenei a le Palemene.

Ae ou te le i utufia le tafa o tofumaoa na saafi ai le Malietoa i lona galala, ou te muai faatulou i le paia o le Maota o le Palemene ma le atunuu aua o lea ua tini tauao i ai paia ma mamalu o Samoa atoa. Tulouna le paia o le Palemene i le afio o lau Afioga i le Fofoga Fetalai, tulouna i lau Afioga i le Palemia, le Sui Palemia ma le mamalu o le Laulau a Fono a le Kapeneta. Tulouna le paia o sui usufono filifilia uma o itumalo faaalafaga, tulouna le paia i le nofo a Komiti eseese o le Palemene i ona tulaga faalupelupeina.



24 IUNI 2016

**Tulafono Tau Faaofi o le Faatatauina o Tupe Faaopopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

Ou te faatalofa atu foi i le faafofoga tapuai mai a Lana Afioga Mamalu O Le Ao o le Malo, lau Afioga Tui Atua Tupua Tamasese Efi ma lau Masiofo faapea le paia maualuga i Sui o le Fono a Sui Tofia, i lo outou vaa seetolu, lau Afioga Tuimalealiifano Vaaletoa Sualauvi, lau Fetalai Tuiloma Pule Lameko, faapea lau Afioga Le Mamea Tuiletufuga Ropati Mualia.

Ou te faatulou atu foi i le tapuai mai a lau Afioga i le Faamasino Sili lau Afioga i le Aoe, Patu Tiavaasue Sapolu ma le paia o le Faamasinoga a Samoa.

Tulouna le paia o Tama ma o latou Aiga, o Aiga ma latou Tama, le mamalu ia Tumua ma Pule, Ituau ma Alataua, Aiga i le Tai ma le Vaa o Fonoti. Tainane foi le faafofoga tapuai mai a o tatou uso i le motu i sasae aua Sua ma le Vaifanua, Fofu ma Aitulagi Saole ma Saleaamua ma le Launiu na Saelua, le Laau na Amotasi, Auvaa o le Tootoo ma upu ia te oe le Manuatele.

Ou te faatalofa atu foi i le tapuaiga a Ofisa Sili o Pulega o Matagaluega ma Pule Sili o Faalapotopotoga a le Malo, faapea foi le Afioga i le Failautusi o le Fono ma le paia o le aufaigaluega a le Ofisa o le Fono.

Ua maua foi lenei avanoa ou te faatalofa atu ai i le tapuaiga a le aufaigaluega tofofi a le Atua o feoi o le Talalelei o lo o tauasuina le ipuvai o le ola aua se inumaga faaleagaga a Samoa mo nei ma a taeao. O paia ma mamalu faalupe ia o Samoa ua taoto a o se alaoo, e leai se poto po o se vave na te toe suia, aua e mai le vavau e oo i le faavavau. Nuunuu atu ia ia Tumua ma Pule la latou matafaioi.

Lau Afioga i le Fofoga Fetalai, ina ne i tuutuulua afeoe o le vaalua i lau folasaga, ae ou te fia afea muamua si ou itumalo pele o Vaimauga Sisifo Nu.2 po o Vaimauga le Sogauga aua a na le seanoa la latou faaeaea i lou nei tagata po o penei ou te le o saofai i le Nofoa o le itumalo. Lou itumalo e, faafetai le lagolago, faamalo le lotonuu, faafetai le tofa sailimalo, o lea ua silimea le seuga nai tuavao ae silasila saaga le paia ma le mamalu o le Palemene o Samoa i le matagofie o lou alofa faaalua i le itumalo. O lo tatou galulue mulumulu aufoe faatasi aua le faamoemoe mo se tatou sao i upufai o le atunuu o lea ua malama ai i ulugalu e pei o le saoga o le faiva o le Tapuiea. Talofa ua sula fala o ieie i lou lailoa ai, o lou fatuatia ma le ulufia o ou aao mo le tapenaga o le faiga palota. Se a ea le tagata faatauavaa ua e manatu ane ai? Na o Asomua na sii lona fale i le mauga, a o lenei ua sii atu foi ma lou fale i le mauga, ona o le moni o lau sailimalo ma le moni o lou lotonuu. Na o le Atua na tetaui atu lou agalelei, ia alofa le Atua ma tau ai atu lou fitaituga.

A o paia o Sinave ma Motootua, o Tauese foi ma Matagalalua, e le tau faalauiloa, e tumau pea e le ave. O le tatou itumalo foi Vaimauga Sisifo o lo o tu ai le taulaga a Samoa e tapuvaetasi i ai le atunuu. E le gata i fatia ua alu ma taimi ua sola, ae oo mai i le aso.

24 IUNI 2016

**Tulafono Tau Faaofi o le Faatatauina o Tupe Faaopopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

Le paia e o le itumalo i le afifio o Tama Alosina ia Seumanutafa ma Toomalatai, le afifio o Fuaifale o Salevalasi ia Tamaseu ma Faualo, afifio o laua Matua ia Faaolesa ma Onofiatele, le faletolu ia Tuiletufuga, Letaa ma Pupualii ma le Vainalelepa. Tapuai maia ma tui mai le mulipapaga se i ou taumafai e taia le tuluvao aua so ta sao i upufai o Malo.

E le vaea foi le falaooto i lo tatou va nonofo ai aua le afio o Usoalii ia Tupuola, Faumuina ma Siligatusa, afifio Matua ma le aiga Sa Malietoa ma le paia eseese o Aiga e fia e pau mai Mulinuu, Sogi, Fugalei, Savalalo, Taufusi, Togafuafua, Saleufi, Palisi, Alamagoto, Aai o Fiti, Lalovaea, Leone, Vaisigano, Papauta, Setemafou, Alaoa, Vaoala, Letava, Papaloloa. Susu mai oe Tuisamau ia Feagaimalii ma Samau. Mapu ane laia i sasaga ma tuumuli o vaatele se i fana le u i le vateatea a la outou sui usufono, tatou talia lupe o mau, e faigata lau tapuaiga mo se ai o le ta itumalo i lenei Paeaiga.

Faafetai i le Atua ua filifilia le tofi o le tatou itumalo e le Afioga i le Palemia i le laulau a le Kapeneta, aua sa taumate i le ete ma tauilo i tofaga pe tau ane ai le faatatau a le Afioga i le Palemia. Faafetai, faafetai, o lenei ua pale lo tatou vaa sa lalaga, o le viiga lea i le Atua. E lagona lava le faatauvaa ma le le tusa ai ma le faaeaea taualoa. A o la le fai Salamo, ðAua, aua, aua lava nei ia tatou le viiga, ia tuu atu pea le viiga i le Atua aua e onomea ma tatau Lona laei i viiga, le faamanu ma le faaneetaga.

Faafetai i le aufaigaluega a le Atua i fatafaitaulaga uma o le itumalo mo talosaga molia i faletui i sou sao ia Manuvao o lea ua tau ai le ai o alae e pei o le fetalaiga i le pa ma le aso. Faamalo tatalo, faafetai faamalosiua, faafetai i taimi e tau fai ifo ai le malosi o le tagata. O faiva e manuia, o faiva ia e tapuaia.

O se taimi muamua lenei talu ona faavae mai le Malo o Samoa ua filifilia ai se matai o le nuu o Apia i le tofi o le Minisita o le Kapeneta. E ui lava e le o se mea fou i le itumalo lenei ma o se mitamitaga tele lea i lou agaga. E le uma ai lava le fia faafetai i le Afioga i le Palemia.

Le itumalo e, tuu maia se avanoa se i tau tapena ai la outou auauna. Atonu e le o toe mamao se taimi ona tatou feiloai lea, e le galo Afia i si ona vao. E fou lou tofi i le galuega faa-Minisita, e le taumatefa foi tulaga o fita ma le faigata o le galuega aemaise o le faatuatuaga ua tuuina mai i lou faatauvaa e tauave ai tofi faa-Minisita. E faamoemoe lava mea uma i le agaga o le Atua i lona faatasi mai e manuia ai faiva ua tofia i ai. Ou te talitonu lau Afioga i le Fofoga Fetalai ua lava lea lauga, atonu e maua nisi manatu i se taimi o i luma.

A o se manatu i le Tala o le Tupe ua faapea ona faataatia nei, e avatu lava le faamalo i le Minisita o Tupe, faamalo i le Ofisa Sili o Pulega o le Matagaluega o Tupe, faamalo le galue, ma e lagolagoina atoa e lenei itumalo le Tala o le Tupe e pei ona talanoaina nei.

I le Minisita mo Galuega, Felauaiga ma Atinae Eeseese, faamuamua pea auala o le ta itumalo, o lea ou te nofo ai ma e papaaao ai i le ta itumalo.

24 IUNI 2016

**Tulafono Tau Faaofi o le Faatatauina o Tupe Faaopopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

O talolasaga ua faapea ona taatia i le Laulau a Fono mai lea itumalo ma lea itumalo, taatia mai laia, o le a soalaupuleina faatasi ma le Minisita o Tupe ina ia maua se tali vave. E i ai foi faiga faavae e tatau ona mulimulitai i ai i lea fuafuaga ma lea fuafuaga aua se tali atu i la outou faatalosaga.

Lau Afioga i le Fofoga Fetalai, o le a seu i fanua le sa o lenei itumalo o Vaimauga le Sagauga. Ia lagi e mama ma faafualoa e le Atua le soifua o Lana Afioga Mamalu O Le Ao o le Malo ma Lana Masiofo. Ni ao gasolosolo aua le tapuaiga i le Sui o le Fono a Sui Tofia, lagimama lau Afioga i le Fofoga Fetalai o le Maota, ia manuia lou tulai mai i le foe. Faamanuia i le Palemia ma mamalu o le Kapeneta ma sui usufono uma o le Palemene. Ia manuia le faafofoga mai o le tapuaiga a lou itumalo o Vaimauga Sisifo po o Vaimauga le Sagauga ae ou ola i le alofa o le Atua. Soifua.

**FOFOGA FETALAI:** Malo faafetai saunoa i le Afioga i le Minisita mo Faamasinoga, ua faafofoga foi le itumalo, ia aumaia le tapuaiga e manuia ai faiva o lo outou sui usufono, ia o le tapuaiga a le itumalo ma le atunuu.

Ia ma o le avanoa foi lenei ou te tapa ai lau Afioga i le Minisita mo Fesootaiga ma Faamatalaga Tekonolosi, tulai mai e saunoa.

**Afioga Hon AFAMASAGA LEPUIAI RICO TUPAI (Minisita mo Fesootaiga, Faamatalaga ma Fesootaiga Vavave Faaneionapo):** Faafetai lava i lau Afioga i le Fofoga Fetalai. A o le i amata se faamatalaga, e muamua ona ou faafetai atu i le Ofisa o le Fono i nofoa ia matou te nonofo ai. O le manaia ia o le nofoa i le faalue, a o le manaia foi o le nofoa, o lea lava ua latalata mai le taimi e lauga ai, ae te i lava ua luelue le nofoa ae ta te le o gaioi. Ia, faafetai tele i le tofa i nofoa ua faaoaga.

O le nofoa lea ou te nofo ai, ua ou fiafia lava i lou sau e tele e leai se isi o nofo i i le autafa lea ona o le tele o mea e mafai ona tuu ai au api, o pepa. Ae ina ua logo mai e amata atu i i le tali a le Malo, na vave lava ona ou manao e sau se isi e toe nofo i le pito lea. Ae faafetai i le tofa ua ae i le Afioga i le Palemia o la e ua oso mai le la i o, ae goto i le pito lenei a Amerika Samoa. E manatua ai le toe suiga o tatou aso.

Ou te tulai atu i le ava tele, o le a ou le tapuea faalaau le ola le paia o Samoa i lenei taeao o le Fonousu a Samoa aemaise o le faafofoga tapuai a si o tatou atunuu. Tulouna le susu o Taitai o Ekalesia ma le Afaigaluega a le Atua o lo o tuitui sauli aua le alo o Samoa i ona faiva. Afai ou te uia le ala i Tavalagi, e popole, aisea? Aua e ae i mauga ma ifo i vanu o le Tuiatua. Afai foi ou te uia le ala i Tuavalu na ifo ai le aiga Sa Tagaloaalagi ae faalava le tamaitai o Leamo e popoe foi aua e faigata le Malietoa. Ae tau ia ina ou faapea atu, lau Afioga i le Fofoga Fetalai ma le paia o le Maota aemaise le tapuaiga a Samoa, tulouna galu e fa na faafua aua Aiga o Tupu, Aiga o Nofu ma Aiga o Papa o Samoa.

24 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

Tulouna galu e iva o Aloalii o Samoa, tulouna peau e sefulutolu o Aiga o Samoa, o paia foi o tapu e sefulu ma Mulivai Fetaiai, ou te talitonu o le atoaga lea o tupu nai ou malae ma le anofale, o le vaifala o Samoa, ou te manatu e le soona sagolegole i ai se tautai i aso faapenei. Tulou foi le tapuaiga a le tatou motu i Sasae, tulou tulouna lava.

Ou te faatulou atu i le faafofoga tapuai mai a Lana Afioga Mamalu O Le Ao o le Malo ma lana Masiofo, i le afio o lo outou sa seetolu aua Sui o le Fono a Sui Tofia, e faatalofa atu foi i le Tafatolu o Faigamalo i le afio o lau Afioga i le Faamasino Sili ma le mamalu o le Faamasinoga, afio foi lau Afioga i le Fofoga Fetalai ma le mamalu o le Fonousu a le Palemene, aemaise lau Afioga i le Palemia o le Taitai o le Malo ma le mamalu i Minisita o le Kapeneta.

E faatalofa atu foi i lau Afioga i le Failautusi o le Fono ma le Ofisa mamalu aemaise afioga i Ofisa Sili o Pulega ma Pule Sili o Matagaluega ma Faalapotopotoga a le Malo o lo o faatasi mai ma le tapuaiga leleoa a si o tatou atunuu pele mai ona fata maualuluga seia oo lava ina auvae mauga.

Ou te manatu o lea ua e lafo i lumafale le viiga o le Atua i lenei taeao ma ua e soaina foi nifo o le fatafaitaulaga aua le siitia o le tatou viiga. E manatu tau lava ina tatou toe fono faapipii ia tumau atu i le Atua Lona viiga nei seia oo i le faavavau faavavau lava.

Si ou itumalo e, e lagona le ootia pe a ou tau ia te oe Aana Alofi Nu. 3, ia tapuai maia ae se i ou alo ane aua finagalo faaalua o le mamalu i le Fonousu a Samoa i lana Paeaiaga Lona XVI. Lau Afioga i le Fofoga Fetalai, ae ou te le i alo e ta se ai muli a le Malo aua lou tali atu i le mamalu o le Palemene, ou te manatu o lenei itula e fofogaina ai le faafetai a lou itumalo i le Afioga i le Palemia ona ua afea lenei itumalo i lona finagalo ma ana tofiga ua ova i le 30 tausaga e le oo mai le tofi Minisita i le itumalo lenei o Aana Alofi Nu.3. Faafetai faafetai tele. Lau Afioga i le Minisita o Tupe, matou te faafetai atu e tusa ma le galuega maeaea ma le tapena, faafetai i lau Afioga i le Pule Sili ma le mamalu o le Ofisa mo le galuega fita, ma e matua lagolagoina e lenei itumalo le Tala Faatatau o le Tupe 2016/2017.

E faapea foi ona matou momoli le faafetai i le Komiti o Tupe i lau Afioga i le Taitaifono ma la outou Komiti i le galuega fita sa faafeagai ai aua le toe auiliiliina ma e momoli ai le faafetai i nai au Matagaluega ma le Pule Sili o le Matagaluega o Fesootaiga faapea foi le Susuga i le Tamaitai Pule ma le Faalapotopotoga o le Pule Faatonu, a o le Falemeli foi ma le aufaigaluega o le Falemeli a Samoa ona o la outou lagolagoina o tulaga uma i Paketi a nei matafaioi o lo o i lalo o la matou vaaiga.

Le mamalu e o sui usufono, ia ua tupu lava matagi i liu o vaa i outou finagalo faaalua. E le tele ni finagalo na agai mai, ou te manatu o se vaaiga foi lea ma foliga o galuega a le Malo sa faatino i lea tausaga ua tuana'i atu. O galuega faaauau nei a le Malo e tali atu ai i outou manaoga, aemaise o le itu tau fesootaiga. Ou te manatu o outou finagalo ua faaalua e ala i le televise ma manaoga tau leitio, o manaoga tau telefoni, o initaneti, ma so o se tulaga o fesootaiga, ia tau lava ina matou tali faapenei atu i lona aoatetele.

24 IUNI 2016

**Tulafono Tau Faaofi o le Faatatauina o Tupe Faaopopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafaiga faaauau i luga o le faitauga faalua**

O le tulaga o faiga faavae a le Malo ma lana manulauti, ina ia faasopolia le atunuu lenei i faasalalauga, ina ia faafaigofieina faasalalauga i totonu o le tatou atunuu ma fesootaiga. A o fea pito e le i taunuu i ai, tau ina matou faapea atu, onosai mai, o le a faaauau atu, ma o le a faaauau atu galuega o lenei lima tausaga. O le taimi nei foi mo lo outou silafia o lo o galulue le Malo e tau aumai i luga le tatou paipa mai lalo o le sami, submarine cable o lo o faamoemoe e taunuu mai i le tausaga fou. O le faamoemoega ina ia faapipii faatasi ma le tatou Samoa National Broadband o lo o i ai nei pei ona taua e le tele o a outou folasaga ma outou finagalo ona faapea lea ona faafaigofie ai fesootaiga, faataugofie ai fesootaiga, ma faaatoataoa ai fesootagai i totonu o le tatou atunuu. Ua tatou ola i se olaga e pei ona outou faafogafoga i letele o folasaga ma le taua tele o le tekonolosi, o le fatu lea o le tamaoaga o le atunuu. O lo o tatou ola i le mea e tau o le E-role, o le E i le tatou faa-Samoa. O le E-commerce, E-agriculture, E-education, E-tourism, tele ituaiga E. O lona uiga o lo o outou faafogaga mai nei, o le fatu o le tatou tamaoaga, ma o le fatu o le tatou atunuu lea o lo o uu i aao o Lealailepule ma ou lima. Ae aua tou te popole, o lea o lo o faagasolo a tatou galuega, ma o lea foi ua faamaumau uma outou finagalo o le a amata ona faagasolo atu i ai a tatou galuega fai. Ae ki ki mai pea le TV, ki ki mai pea lau leitio, e alu alu lava ola.

Ia, lou itumalo pele o Aana Alofi Nu.3, i le susu o Faafeagaiga o lo o faafalelemalu i lo tatou itumalo aua le tauasuina o le vai o le ola, faamalo faafetai mo a outou talosaga ma la outou tapuaiga. E le gata a o alo si o tatou atunuu e faaae le tai ma faaifo le vao i le faiga palota na se i mavae atu nei, ia ae faapea foi i lenei taimi a o tau sii le sa o le Malo e amata a latou galuega fai. O la outou faatofalaiga i le mana o a outou tatalo lea ua momoli mai e ao ae tuutuu mai e le savili. Le afio o Saipaia le Aloalii aemaise o Sauimalae, le matua taulagi ia Taito faapea le afio o Lilomaiava. Le afio o le Tamaitai tasi o Aana lau Afioga Letelemaana, maluu mai le matua ia Pei ma le Falefa aemaise lau fetalaiga Satuimalulufi.

Tainane foi le afio o lau Afioga i le Saoalii lau Afioga Toalepaialii ma lau Tapuala, lau Fetalaiiga Vaili o le Laau na Fausia ma le mamalu i le Faleaana ma si o tatou nuu i Satapuala. Le afio o lau Afioga Letelemaana, afio foi lau Afioga Taimalelagi ma alo o Taimalelagi ia Feiloivao, le afio o le Taofia aemaise le alaatai o lau Fetalaiiga Talimatasi ma le mamalu i le Faleaana ma le tatou nuu i Faleatiu, aemaise si ou nuu pele ia Vailuutai ma Fasitootai aua le afio o le Aiga Taulagi i malae na lua, afio o Toleafoa ma le falefia o ona alo, aemaise foi le afio o lo outou fale Tologafua Afamasaga ma Afamasaga ma Afamasaga. Afio o lau Afioga i le Maopu o le Tuiiana lau Afioga Tuigamala, ae tainane le alaatai o oe le alii o aiga o le Falefitu ma le Fale Fasitoo. Fai mai le tagi faasulu a le tamaitai o Sinalemalama, ua maea ona tapena le maota, ua salu ma ua sisi pola, ua fofola foi fala, ona fai mai lea o ana upu, se ua ta fia pai i vai o le tama ia Maile Leanapapa.

24 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

E faapena moomooga o Seaula i la outou auauna, e le mama ia te au la outou faaaloalo lea ua ou seei mai ai i le nofoa o le ta itumalo. Tau lava ina ou paia vai o le tama ma ou faapea atu, faafetai i la outou pule, faafetai le faaaloalo. O la outou pule lea ua toto tetele ua ou sapaia faatuaelele, o lea ua tau i le niusina la outou faaeaea, a o lou loto ua sooaemalelagi i le olioli i le Atua ona o lou valaauina. Ae lafo mai laia, o a o tatou manaoga o i ai, o lea ua uma ona tuu i aao o le Malo e faasolosolo i ai ana galuega, ae tuu maia au se i ou ta se ta mamao e le gata mo le manuia o le ta itumalo, ae faapea foi ia Samoa atoa ma lenei tofiga.

Ou te fia faaogaina foi lenei avanoa lau Afioga i le Fofoga Fetalai ou te faafetai faapitoa ai i le Afioga ia Toeolesulusulu Cedric Pose Salesa Schuster, o se uso a o se tamalii foi o lenei itumalo sa ia tauave le tofi i le lima tausaga ua mavae. Faafetai tele ia te oe Toeolesulusulu i galuega uma sa faatino i lena lima tausaga. Faafetai foi i lou taalo faatamalii a o faapea ona alo le tatou Malo mo le faiga filifiliga. Aumai laia lou faatuatuaga o le a ou asu se ta ipuvai aua le atinae o si o ta itumalo i lenei lima tausaga.

Lau Afioga i le Fofoga Fetalai, ou te fia faaii i lou faafetai i nai ou aiga ma nai au uo e le gata i Samoa nei a o atunuu i fafo. Faafetai tele i la outou lagolago, faafetai tele i la outou talosaga o lenei ua iu manuia faiva o le atunuu a o lea foi ua amata ona alo le tatou sa. Ia tapuai maia ma tatalo, ia alofagia e le Atua ma ia faamanuia ia te outou. Lou itumalo e, ia to manuia o le itumalo i outou eleele, ia ufitia ai le vaomatua, ma ia faapea ona lilofia ai le gataifale. Ia agalelei le Atua i susuga i Faafeagaiga aemaise lo tatou itumalo atoa ma e uma o lo o palota i le tatou itumalo.

Lau Afioga i le Fofoga Fetalai, ou te le mafai ona ou nofo i lalo ou te le i faafetai i lou toalua ma lau fanau. O lea sa saunoa nisi o sui usufono, o au le sui usufono laitiiti toe aulelei, ae ou te fai atu ia te outou, tou te le i tagai i le lalelei o lou toalua, o le best lava lea a le toaina.

Ona faauma atu ai lea o au upu faapea, o upu a le Perofeta o Isaia i le Isaia 40 fuaiupu 31, ona o lea ou te mulimuli i le tali a le Malo i lenei aso ma le Tala o le Tupe, fai mai upu o lo o i ai, oA o e faatalitali i le Alii e faafouina i latou, e faaloaloa o latou apaau e pei o aeto, e tamomoe ae le vaivai, e savavali ae le saogalemu. Tuutasi le faiva o Pili i le Atua. O le tatou faatamasoaliiiga ua amatalia i lenei tausaga, tatou tuu i le Atua, o le Atua lea o lo o faavae ai lo ta Malo. Ia manuia tele le Fonousu a Samoa i lenei aso, aemaise le tapuaiga faafogafoga mai a si ou atunuu pele, i le suafa manumalo o Iesu. Amene.

**Afioga Tafua Maluelue Tafua (Aleipata Itupa i Lalo):** Lau Afioga i le Fofoga Fetalai, sa ou le fia faalavelave lava o saunoa le Minisita, ae faafetai foi o lea ua faaiuiu le saunoaga a le Minisita. Ae tatau pea ona avatu se manatu, sa ou le faalavelave foi ona o lea e tu le manatu taumafai ia faapupuu ia vave ona pasia le Tala o le Tupe.

24 IUNI 2016

**Tulafono Tau Faaofi o le Faatatauina o Tupe Faaopopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

Na pau le mea ua ou tulai atu ma le agaga faaaloalo, sa ou le faalavelave la i le saunoaga a le Minisita, ona o lea e foliga mai e pei lava ua tuu atu pea le faatuatuaga i le Malo ma Minisita. Faafetai lava mo le tali ua aumai e a outou Afioga i Minisita. Ia o lea e matau atu o le tali lea ua aumai, e pei o le tauloto masani lava lea, ia taatia atu, lafo atu le faatuatuaga, ki mai pea lau TV e alu alu lava ola, fai sau computer, na ona omiomi lava, imeli mai tali atu le Minisita. O le vaiaso lea, e afe ma afe laautoto e maua i Nu'u, ae o le vaiaso na tea nei na ou vili i Nu'u e leai ma se laau. Na pau lava laau e aumai, na o le sefulu lava laau e aumai. Aua tou te popole o lea ua faamaumau outou atugaluga.

Lau Afioga i le Fofoga Fetalai, ma lou agaga faaaloalo ou te tulai atu ai o lou lava sui usufono, ua matua faamalieina i a outou saunoaga. Aisea? O lea ua avatu le faatuatuaga i a outou Afioga. Ou te manatu foi o le tulaga uma lea i le matou vaega o lea lava tatou te taumafai uma ia fesoasoani ma lagolagosua i a outou Afioga. O lea ua avatu le matou faatuatuaga, o lea o le a omiomi a matou computer, o lea o le a ki le TV ona e le o ola foi a matou TV, o lona uiga e oomi oomi lava ola. O le a matou tui le mulipapaga ma uliuli o matou faiva a Malo, alo i outou faiva o le a matou tapuai, ae ia tautuana, o le a lafo atu le faatuatuaga, ae o le tausaga lea i le taimi foi faapenei, o le a tatou toe feiloai, ona ou toe tu foi lea e faamanatu atu, e oomi oomi lava ola le TV, pe fiu foi e imeli atu lau Afioga, a o lea e maua nei le tala e leai sau computer. O le agaga lea ma le faaaloalo, lau Afioga i le Palemia ma lena itu o le Vaega Faaupufai, e lelei ona matou faamanatu atu, e i ai le e taofiofi, e i ai foi le e faamaumau. Ia manuia outou faiva ae matou tapuai.

**FOFOGA FETALAI:** Malo faafetai. Se i tulai mai le Minisita mo Faatoaga ma Faigafaiva.

**Susuga Laauli Polataivao Leuatea:** Lau Afioga i le Fofoga Fetalai, na o si mea laitiiti lava lea leaga e ogaoga le tuuaiga faapea e alu atu i uta e leai ni mea o i ai. Ae faapuupuu atu e te alu atu ia ta talanoa po o sao le Matagaluega lena na e afio i ai.

**FOFOGA FETALAI:** Malo. Ia faapena ia ona fai. Se i tulai mai le Afioga i le Palemia.

**Susuga Hon TUILAEP AUELUA FATIALOFA LUPESOLIAI LOLOFIETEELE AIONO NEIOTI GALUMALEMANA DR. SAILELE MALIELEGAOI:** Lau Afioga i le Fofoga Fetalai, o lea ua ou tulai atu ona o lea ua e tuuina mai le avanoa ou te tali ai.

24 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

Lau Afioga i le Fofoga Fetalai, i le toe saunoaga a le toe aeto lea na saunoa nei mai lenei itu, ua faaiu ai le tali atu a le aiga Kapeneta i mataupu sa l g , ma ou te toe t ōua o le isi Fonotaga aupito maoaē lenei i le oā o mafauauga, ma e leai foi se isi mea e tatau ona fai, au o le mea lava lena e tatau ona fai. Lafo mai, e le lafoa i fafo. E lafo mai. E leai lava se isi mea e tatau ona fai. Lafo mai i le Kapeneta ona gaoioi lea o le Kapeneta. E lima tausaga e faatino ai le tatou galuega. O le mea foi lea na ona ou toe faamanatu, o l lava e naunau e fai i le amataga ana galuega, e oo atu i le faaiuga ua galo uma lava i le itumalo. O le mea lea, lafo mai pea e faasoaso tatau ai e i latou ua tuu i ai le tiute. Ua uma foi ona fai le latou tautoga, o le tautoga o le faamaoni. O lea, Minisita a e ole Kapeneta fai i le malosi e oo i ai. E i ai le fonotaga na tu mai ai le sui usufono o le Itu Agai, o lena sui usufono o le malomalo ia i totonu o le Maota, ua tuua le Malo. Ae amata loa Fono, fana loa i le tuōtuō le Malo. Na alu alu lava, fai mai loa lana saunoaga, ōTuilaepa, faatonu ane au Minisita seā tau taofiofi, ua tele tele nei galuega e fai, seā tau taofiofi.ō Ia ona ou tu foi lea i luga, o la e mau i faamaumauga o Fono a le Palemene. Ona ou tu loa lea i luga, o laŋ tali, ōO outou Minisita lea ua outou faafogafoga i le saunoaga a le Itu Agai, ua outou televavave tele, o le mea lea, afai o toe i ai se isi malosi i tua atu, ia faatelevave atili. O le mea la lea, ia faatelevave atili la outou galuega.ō O l na te iloa le mea e fai, fai, aua le tuua, e faatino ai a tatou galuega. O lea sa ou t ōua, e 90 tatou atinae o i ai nei e tasi le piliona, 500 miliona tala le tau atoa. Aø le mea lea e tuai, o le tuai o le faatinoga o galuega ia. Aua e tatau ona tapena lelei. Ma e i ai lava le mea e tasi lea ou te maitauina, o le tulaga i le vai. Tele afioaga ia e talosaga mai i le vai, ma o le mea lea e tatau ona faaleleia le vai. O le ala foi lea na ave ai le faat ua a le Malo mai lava i le amataga o le tatou faiga paaga ma Europa. Na aumai le isi \$60miliona fai atoa ai tane vai tetele ia e i Ululoloa, mo le Taulaga ma alu atu ai lava i Samatau. Aumai foi le isi \$60miliona tala mai Europa fau ai tane tetele ia e i Palauli i Vailoa, lea e alu atu lava e tau i Puapua. O le Aso Tofi o le vaiaso talu ai na ou sainia ai le isi \$20miliona EURO tusa e \$70miliona Tala Samoa mo vai. O le tulaga i le vai e eli i le manava o le eleele o le mea moni lava, so o se eleele e eli ó e eli ma le le atoa o le iloa pe maua se vai. E eli, eli, eli, eli, tolu masina tau i lalo ae leai se vai, ua maumau atoa lava lena taimi atoa ma lena seleni. O le ala lena pe eli, eli, eli tau i le vai, e le umi lava ona faaoga ae pe sua lua, ua tau i le sami.



24 IUNI 2016

**Tulafono Tau Faaofi o le Faatatauina o Tupe Faaopopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafaiga faaauau i luga o le faitauga faalua**

O le ala foi la lena e ala ai ona faat ua e le Malo le mea lea o le fai o mita, ina ia faat ua e o tatou tagata le vai, nai lo le mea lea o le tatala aua o taimi uma lava e tatala faasoloatoa. Aua o taimi uma lava e tatala ai ma sau ma sau ma sau pea le vai ma maimau ona alu lava lea o le vai lea e sau mai lalo, o le manava o le eleele uma. Ae sosolo ane loa le sami.

O le ala lena e fai ai polokalame e tau faasao ai laau o le vao e taofiofi le suavai e aa o laau ma le tuupaolo mai ave o le la e vave mitiia le suavai a o le i goto le eleele e faaputupu ai . O le faalavelave ua agai tele tagata e ta le laau i lalo mo fale ma afatoaga ua tau leai ai ni laau ma laulaau e mitiia kasa oona(CO<sub>2</sub>) mai gaioiga a tagata na faatupu atili mai le 1800 i le amata faatetele o fale gaosi oloa a papalagi ma taamilomilo ai lava lea i le lalolagi e tau mai i le taimi nei. E amata mai lava i le taimi lena e oo mai i le taimi lenei, o la e taamilomilo lava kasa oona nei i le lalolagi, ua le mafai ona mitiia e laulaau ona o le tele o laau ua tatau. Na pau lava lena o le mea na ala ai ona taofiofia le taamilosaga lenei a kasa leaga nei, o laau latou te mitiia. O le taimi o Iesu e pei na o le 250,000miliona tagata sa i ai i le taimi lena o Iesu i le lalolagi. E a la le taimi lenei? Ua 7piliona. A o le fananau pea ona tupu tagata, e tatipi atili ai ma laau i lalo aua aai ma atu falega, e le o mafai e Saienisi ona gaosi ni masini e mitiia ai le kasa lea e taamilo i le vanimonimo. O le a la le mea lea e fai mai ai Saienisi? Ua tuai, ua fai sina tuai o le lalolagi i le sainia o le feagaiga lea na saina nei. Sa tatau ona saina i le 100 tausaga talu ai ma amata ai ona galulue atunuu e toto laau e mitiia kasa ia oona ua mafanafana ai le ea. O le taimi lenei, o le isi mafaufauga lea ua i ai, a fau ni fale tetele, toto ai ma laau, tusa lava po o nai laau laiti, ina ia tau maua ai laulaau e mitiia le kasa lea e gaosi e le tagata ma faaleaga ai le siosiomaga. O le a la le uiga o ia mea? Fai mai Saienisi ua tuai tatou. O lona uiga po o le 100 tausaga lea, e agai atu pea ina faigata le suiga o le tau. E ono agai atu ina umi pe alu le tausaga e le toe timu nisi atunuu. O fea le mea e o i ai tatou? Pe tasi foi le timu ae timu ai lava timu ai lava, oso mai le Tsunami e matautia le mea e oo i ai, oso ai ma afa. O le afa lea na agi i inei, o Ofa i le aso 1 Fepuari i le 1990, na oo i le 125 maila i le itula. I le aso 7 Tesema 1991 oso Valelia, e 175 maila i le itula, e agai pea i luga. O Winston lea na oso nei, na amata mai i talane o Aleipata le matagi lena faasolo ifo ai i lalo i Toga ae faatoa agi malosi i Fiti, e 200 maila i le itula le malosi.

24 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafoga faaauau i luga o le faitauga faalua**

O le matagi lea na agi i o e lua ea pe tolu tausaga talu ai i Filipaina, e 300 maila i le itula a le faatin o Afa uma. O le vaaiga a Saienisi, e agai pea i luga. O lona uiga a agi se afa i Samoa 300 pe 400 maila i le itula, o lona uiga e leai se fale e toe tu, ma o vaaiga na a Saienisi. O le a le uiga o nei mea? O lona uiga, tatou faalagolago i le Alii e fesoasoani mai. O le piriota o afa ia na uma atu nei, e lua lelei lava afa na faasoina ai tatou e le Alii, ioe. O lona uiga e le uma le tatou faalagolago pea i le Atua e fesoasoani mai. O le mea lena e taua ai le vai. Ma ua oo foi mafauauga i le tatau ia ona aumai masini e mimiti mai ai le sami ma aveese le masima e maua ai le vai magalo, o le mea lena e ono oo i ai tatou. O le ala foi lena e ala ai ona taua tele le faamalosiua lea e avatu e le Malo, mita vai, ua oo i le taimi e le tatau ai ona toe faatamala tatou i le soona fai o le vai, ki lava le vai e le kea i le isi uso o loo faatali mai se vai mai le paipa. A o isi aiga, o la e fia maua se vai, a o isi afioaga, fai mai latou te mananao e fai ni o latou vai palapala. E le i vaai tagata i le matautia o latou e mamai, pipili, e pe atoa tino ua le mafai ona gaoioi, ona o le siama e sau i le vai. O le mea lena ou te talotalo ai i le sui usufono mo Vailoa Palauli, talanoa i le tou nuu, tau i ai le mea sao, tuu uiga ia faanuupo o le toe avatu o se vai palapala. Talanoa i le tou nuu o la e fia feinu afioaga la e i talaatu i le Faasaleleaga e le mafai foi ona nofonofo latou pe a le sua le vai.

O le ala lena na pasia ai e le Palemene le Tulafono e pule le Malo i le faaogaina o le suavai, suavai mai le lagi, suavai mai le Atua e feinu ai tagata ola uma.

Lau Afioga i le Fofoga Fetalai, o tulaga taua na ou te toe faaopoopo atu ai i mataupu o le vai. Ae o le agaga ia te outou o Minisita, mataala, Minisita galue ma Minisita Lagolago, o lea ua tau atu ia te outou, a i ai ni a outou mataupu, a le maua le Minisita, vaai le Minisita Lagolago o latou ia e lagolagosua i le galuega o lo o faatino e le Minisita. Ia te au lava ia o le Taitai o le Malo, o au e leai ni ou mafauauga. Fautuaina au e le Itu Agai i le tausaga talu ai ua tatau foi ona faamalolo Tuilaepa ia e leai ni ana ideas e fai ai le Malo sao lelei i latou. O upu tuusao, o au e leai ni ideas, ae a tupu mai loa le faalavelave, ou te moomia loa se fesoasoani, ou tatalo loa i le Atua, seā aumai lava sina aitia se tasi se i tope ai le mea lea? Ae sau le mea, ua le tasi a ua 20. O le mea la lena, ou te iloa lava le mea e tatau ma talafeagai. O le mea foi lena a ou vina atu i se mea e fai, ia outou alolofa e fai.

24 IUNI 2016

**Tulafono Tau Faaofi o le Faatatauina o Tupe Faaopopo (Nu. 2) ma le  
Tulafono Tau Faaofi o le Faatatauina o Tupe 2016/2017  
– felafolafaiga faaauau i luga o le faitauga faalua**

Lau Afioga i le Fofoga Fetalai, ia o le Tala lena o le Tupe, ae tuu maia le avanoa se i tatou agai loa i le tatou Tala o le Tupe, seia oo lava ina pasi, pe au ina vivini lava moa nanei, o tatou faataupep e pasi le tatou Tala o le Tupe, o la e faatali mai le atunuu. Ia manuia le tatou Fono.

**FOFOGA FETALAI:** Malo saunoa. O lea ua maea ona saunoa le Afioga i le Palemia, faapea foi ona talifuitau le Malo i mataupu sa laga e sui usufono i le tulaga tau tupe ma le tamaoiga ma faiga faavae tau tupe a le Malo. Ua maea foi ona faatu le lafo ma ua maea ona o le a tuuina atu loa le Fesili.

*Na tuuina atu le Fesili ma faamaonia ai le lafo na faatuina i le aso 31 Me 2016, ma faitau faalua ai le Tulafono Tau Faaofi o le Faatatauina o Tupe Faaopopo (Nu. 2) 2015/2016 ma le Tulafono Tau Faaofi o le Faatatauina o Tupe 2016/2017.*

**TULAFONO TAU FAAOFI O LE FAATATAUINA O TUPE  
FAAOPPOPO (NU. 2) 2015/2016 – iloiloga auiliili**

**FOFOGA FETALAI:** O le a sagai atu le Fono Aoa o le iloiloga auiliili o le Tulafono Tau Faaofi o le Faatatauina o Tupe (Nu.2) 2015/2016.

I le faagasologa o le iloiloga auiliili o le Tulafono Tau Faaofi e mafai ona saunoa faatepa sui usufono i Mataupu o lo o tusia i le Pepa 2016/2017 Nu.1, Tala Faatatau Faaopopo Lona Lua o Tupe Maua ma Tupe Totogi a le Malo o Samoa mo le Tausaga Faaiuina Aso 30 Iuni 2016, atoa ai ma le Pepa 2016/2017 Nu.40. Lipoti a le Komiti o Tupe Maua ma Tupe Totogi i Tupe Maua ma Tupe Totogi a le Malo o Samoa mo le tausaga faaiuina aso 30 Iuni 2016.

E tusa ai ma Tulafono Tumau 134, e amata le iloiloga auiliili o le Tulafono Tau Faaofi i ona Faamatalaga.

**FAAMATALAGA MUAMUA  
VAEGATUPE MA TALA FAATATAU  
FAAOPPOPOGA I TUPE FAATATAUINA**

<b>MATAGALUEGA</b>	<b>FAAMATALAGA</b>	<b>AOFAI</b>
<b>TUPE:</b>	<b>Aofai Tupe Alu Faaopopo</b>	<b>\$3,840,500.</b>

*Faamaonia.*

24 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 – iloiloga auilili**

**PUNAOA FAALENATURA MA LE SIOSIOMAGA FAALENATURA  
MA LE SIOSIOMAGA: \$1,059,394.**

*Faamaonia.*

**SOIFUA MALOLOINA: \$457,082.**

*Faamaonia.*

**FUAINUMERA FAAMAUINA: \$33,000.**

*Faamaonia.*

**AUAUNAGA FAA-SOIFUA MALOLOINA: \$3,500,000.**

*Faamaonia.*

**OFISA O LE PULE FAATONU: \$84,000.**

*Faamaonia.*

**AOFAI FAAOPOOPOGA I TUPE ALU AOA 2015/2016:  
\$8,973,976.**

*Faamaonia.*

**FAAMATALAGA LONA LUA  
FAAITIITIGA I TUPE FAATATAUINA**

**MATAGALUEGA FAAMATALAGA FAAITIITIGA I TUPE ALU**

**TUPE: Aofai Faaitiitiga Tupe Alu \$(3,434,500).**

*Faamaonia.*

24 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 – iloiloga auilili**

**TUPE MAUA:** **-\$ (200,000).**

*Faamaonia.*

**FUAINUMERA FAAMAUINA:** **-\$ (51,600).**

*Faamaonia.*

**AOFAI FAAITIITIGA AOA O I TUPE ALU 2015/2016: \$ (3,686,100).**

*Faamaonia.*

*Na faamaonia le Faamatalaga e avea ma vaega o le Tulafono.*

**FUAIUPU 2: Faamatuu atu ma le Faatatauina o le \$8,973,976 mai le Faaputugatupe a le Matagaluega o Tupe.**

*Faamaonia.*

**FUAIUPU 3: Faaititiga o aofaiga na uluai faatatauina ma toe faasoosoa atu i isi galuega faatino ma galuega faatino laiti.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Faatatauina o Tupe Faaopoopo (Nu.2) 2015/2016.**

*Faamaonia.*

*Na faagasolo le Tulafono Tau Faaofi o le Faatatauina o Tupe Faaopoopo (Nu.2) 2015/2016 e aunoa ma se Teuteuga.*

24 IUNI 2016

**TULAFONO TAU FAAOFI O LE FAATATAUINA O TUPE  
FAAPOOPO (NU.2) 2015/2016 – faitauga faatolu**

**Afioga Hon SILI EPA TUIOTI:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopopo (Nu. 2) 2015/2016 i lona faitauga faatolu.*

*Faaluaina e le Minisita mo Aoga, Taaloga ma Aganuu ma le Minisita mo Faatoaga ma Faigafaiva.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa Faitulafono.*

**TULAFONO TAU FAAOFI O LE FAATATAUINA O TUPE 2016/2017  
– iloiloga auiliili**

**FOFOGA FETALAI:** O le a sagai atu le Fono Aoa i le iloiloga auiliili o le Tulafono Tau Faaofi o le Faatatauina o Tupe 2016/2017 ma Tala Faatatau Autu o Tupe Maua ma Tupe Totogi a le Malo o Samoa mo le Tausaga Faaletupe faaiiina aso 30 Iuni 2017 faapea le Lipoti a le Komiti o Tupe Maua ma Tupe Totogi i le Tala Faatatau Autu o Tupe Maua ma Tupe Totogi a le Malo o Samoa mo le Tausaga Faaletupe faaiiina aso 30 Iuni 2017.

A o le i alo atu i le iloiloga auiliili o le Tulafono Tau Faaofi ou te fia faailoa atu Faasaoga o le Lomiga Samoa i le Tala Faatatau Autu o Tupe 2016/2017. O ia faasaoga e aofia ai itulau V, X, 33, 34, 35, 51, 69, 71, 89, 90, 91, 142, 143, 145, 149, 150, 151, 159, 162, 195, 196, 223, 233, 234, 237, 249, 278, 293, 310, 311, 318, 336, 342, 343, 354 & 380. O le Lomiga Peretania e aofia ai itulau V, X, 69, 89, 90, 142, 143, 149, 150, 159, 163, 164, 165, 166, 167, 189, 225, 229, 239, 240, 279, 296, 297, 320, 326, 327. O lena ua tufatufaina atu i luga o a outou laulau.

E tusa ai ma le Tulafono Tumau 134, e amata le iloiloga auiliili o le Tulafono Tau Faaofi i lona Faamatalaga.

**FAAMATALAGA MUAMUA**

**VAEGATUPE MA TALA FAATATAU**

**MATAGALUEGA TUPE ALU FAATATAUINA**

**FAATOAGA MA FAIGAFIIVA: \$16,660,228.**

*Faamaonia.*

24 IUNI 2016

**Tulafono Tau Faaofi o le Faatatauina o Tupe 2016/2017  
– iloiloga auiliili**

**PISINISI, ALAMANUIA MA LEIPA :** \$15,836,099.

*Faamaonia.*

**FESOOTAIGA & FAAMATALAGA VAVAVE FAANEIONAPO:**  
\$58,111,096.

*Faamaonia.*

**AOGA, TAALOGA & AGANUU:** \$91,186,761.

*Faamaonia.*

**TUPE:** \$75,687,360.

*Faamaonia.*

**MATAUPU TAU LE VA I FAFO MA FEFAATAUAIGA:**  
\$21,104,049.

*Faamaonia.*

**SOIFUA MALOLOINA:** \$86,833,849.

*Faamaonia.*

**FAAMASINOGA & PULEGA TAU FAAMASINOGA:** \$11,213,942.

*Faamaonia.*

24 IUNI 2016

**Tulafono Tau Faaofi o le Faatatauina o Tupe 2016/2017  
– iloiloga auiliili**

**PUNAOA FAALENATURA & SIOSIOMAGA:       \$24,796,776.**

*Faamaonia.*

**LEOLEO:   \$27,640,063.**

*Faamaonia.*

**PALEMIA:   \$7,697,418.**

*Faamaonia.*

**TUPE MAUA:                                       \$10,880,967.**

*Faamaonia.*

**TINA MA TAMAITAI, ATINAE O NUU MA AFIOAGA MA  
AGAFESOOTAI:                               \$11,317,444.**

*Faamaonia.*

**GALUEGA, FELAUAIAGA & ATINAE ESEESE:   \$46,495,810.**

*Faamaonia.*

**OFISA O LE LOIA SILI:                         \$3,025,296.**

*Faamaonia.*



24 IUNI 2016

**Tulafono Tau Faaofi o le Faatatauina o Tupe 2016/2017  
– iloiloga auiliili**

**PULE MA SUETUSI SILI: \$3,380,412.**

*Faamaonia.*

**KOMESINA O FAIGA PALOTA: \$2,050,379.**

*Faamaonia.*

**FONO AOA O FAITULAFONO: \$6,737,388.**

*Faamaonia.*

**KOMESINA O SULUFAIGA : \$1,119,895.**

*Faamaonia.*

**KOMISI A LE AUFAIGALUEGA O GALUEGA A LE MALO:  
\$4,634,310.**

*Faamaonia.*

**KOMISI O FAAFOE MOLIAGA A LE ATUNUU: \$1,599,613.**

*Faamaonia.*

**GALUEGA TAU ALAMANUIA MA ATINAE A LE MALO:\$2,578,529.**

*Faamaonia.*

24 IUNI 2016

**Tulafono Tau Faaofi o le Faatatauina o Tupe 2016/2017  
– iloiloga auiliili**

**OFISA O FUAINUMERA FAAMAUINA: \$4,426,679.**

*Faamaonia.*

**KOMISI O LE TOEFUATAIGA O TULAFONO A SAMOA: \$1,318,280.**

*Faamaonia.*

**AUAUNAGA TAU FALEPUIPUI MA LE TOEFUATAIGA: \$5,973,323.**

*Faamaonia.*

**AOFAI O TUPE ALU AOAQ FAATATAUINA A MATAGALUEGA  
2016/2017: \$492,306,167.**

*Faamaonia.*

**FAAMATALAGA:**

*Faamaonia.*

**FUAIUPU 2: Faamatuu atu ma le Faatatauina o le \$492,306,167 mai le  
Faaputugatupe a le Matagaluega o Tupe.**

*Faamaonia.*

**FUAIUPU 3: Faamatuu atu ma le Faatatauina o le \$501,966 mai le  
Teugatupe a le Tausi Mavaega.**

*Faamaonia.*

24 IUNI 2016

**Tulafono Tau Faaofi o le Faatatauina o Tupe 2016/2017  
– iloiloga auiliili**

**FUAIUPU 4: Faamatuu atu ma le Faatatauina o le \$14,769,185 mai le Faaputugatupe a le Matagaluega o Tupe.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Faatatauina o Tupe 2016/2017.**

*Faamaonia.*

*Na faagasolo le Tulafono Tau Faaofi o le Faatatauina o Tupe 2016/2017 e aunoa ma se Teuteuga.*

**TULAFONO TAU FAAOFI O LE FAATATAUINA O TUPE 2016/2017  
– faitauga faatolu**

**Susuga Hon TUILAEPA AUELUA FATIALOFA LUPESOLIAI LOLOFIETELE AIONO NEIOTI GALUMALEMANA DR. SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2016/2017 i lona faitauga faatolu.*

*Faaluaina e le Minisita mo Pisinisi, Alamanuia ma Leipa, Minisita o Tupe, Minisita mo le Soifua Maloloina ma le Minisita mo Aoga, Taaloga ma Agamuu.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa Faitulafono.*

**FOFOGA FETALAI:** Malo faafetai ua tea lenei galuega tele. Ia avea ia lenei avanoa... Ou te tapa lau Afioga i le Palemia.

24 IUNI 2016

### LAFO MO LE TOLOPOINA

**Susuga Hon TUILAEP AUELUA FATIALOFA LUPESOLIAI LOLOFIETEELE AIONO NEIOTI GALUMALEMANA DR. SAILELE MALIELEGAOI:** Lau Afioga i le Fofoga Fetalai ou te tulai atu ma le agaga faaaloalo e momoli atu le faamalo i le Maota i lau Afioga i le Fofoga Fetalai faapea foi sui usufono o le Palemene ona o lea ua faaiu i le aso le galuega tele sa faafeagai ma i tatou uma, o le pasiaina lea o le Tala Autu o le Tupe e faafoe ai galuega uma a le tatou Malo e amata i le aso 1 o Iulai seia oo i le faaiuga o Iuni i le la tausaga. Ma o le galuega foi lea o lo o tatou taumafai e pasia le Tala o le Tupe, ona e tele tapenaga e tataua ona fai ona tatala aloaia loa lea o le faatagaina o le faaalaina o tupe ae le i oo i le aso 1 o Iulai. O le agaga lea aua ana umi e faataupepe ai lava tatou seiloga e pasi, a o lea ua pasi le Tulafono e lei taina le tasi. Ma ua tataua ai ona fai sina tatou malologa.

O le mea lea ou te faatuina ai le lafo, *Ina ia tolopoina nei le tatou Palemene seia aulia foi le itula e 9:00 i le Aso Gafua o le vaiaso a sau.*

O le lafo lea lau Afioga.

**FOFOGA FETALAI:** Malo faafetai. Ua saunoa le Afioga i le Palemia i le lafo ina ia tolopo nei le tatou Fonotaga seia aulia le itula e 9:00 i le Aso Gafua.

*Faaluaaina e le Minisita mo le Soifua Maloloina ma le Minisita mo Faatoaga ma Faigafaiva.*

*Na faamaonia le lafo.*

**FOFOGA FETALAI:** Malo galulue ua uma foi le tatou galuega i lena aso ua faaiuina ma le manuia e pei ona saunoa le Afioga i le Palemia. Ia tala soifua lo outou soifua ma so matou ola ia avatu i le faaiuga o lena vaiaso. Ae tatou te le i tolopo, o le a ou faaiuga le tatou Fonotaga i se tatalo.

*Na tolopo Tualumaga a le Fono Aoa o le itula e 12:51 i le aoauli seia aulia le itula e 9:00 i le taeao o le Aso Gafua, 27 Iuni 2016.*